



आं तौ आं अरेशो मप्रेंदो

हितोपदेस

ब्रेक्ब मुर: सोलोमनमी मुर आन देशो लोव्र खुप्शा नु आं थुं डा तुइक्तीक लोव्र एको किताबम ब्रेक्शो बाक्ब। गेना ब्रेक्शो: एको किताब सोलोमोन आ सासन पची ना १६५-१२६ बि. सी.म ब्रेक्शो बाक्ब।

गेना ब्रेक्शो: एको किताब सोलोमोन आ सासन पची ना १६५-१२६ बि. सी. ब्रेक्शो बाक्ब।

मार ब्रेक्शो:

१. सोलोमनम “जोक्ब तुइक्ब थुं मालीन” हितोपदेस १:- १:-

२. सोलोमोनम “हेंथे मगाक्कीन” हितोपदेस १०:-२४:३४

३. अरु जोक्ब तुइक्बम ब्रेक्शो रिम्शो पतीक लोव्र हितोपदेस २२:१७-२४:३४

४. सोलोमनम “मुर आन दातेमी रिम्शो बाक्कीन” हितोपदेस २५:-२६:-

५. आगुर नु लेमुएलम “खिं डा मुर ग्येरसीशो दुम्चा मालनीम” दे ब्रेक्शो बाक्ब।

हितोपदेस ३०:-३१:-

हितोपदेस किताब डा शेंसीचा माल्शो लोव्र: परमप्रभु यावे कली मान पा हिंब मुर जोक्ब तुइक्ब दुम्शा, रिम्शो दुम्नीम।

एको किताब आ शेंशो लोव्र

१ एको दाऊद आ तौ इस्राएली आन पिप सोलोमन आ देंशो लोव्र बाक्ब। १राजा ५:६-१२ २ एको किताबम तुइक्तीके नु अर्ती टिचा आ पर्बम शेंसीतीके लोव्र बाक्ब। मेको शेंसाक्नी हना, गे रूपब नु जोक्ब तुइक्ब दुम्नीनी। ३ मिनु ब्रेक्ब मुर आ अर्ती सुमी टीबा, मेकोमी तुइश्शा गेय पने चाप्ब। ठीक पतीके, ठीक निसाफ पतीके नु कुल मकोव्रथु रिम्शो पने चाप्ब। ४ मारेइ मजोक्ब आन कली निप्स खाप्शा गेय पचा शेंब। ठिटा आन कली जोक्ब नु होस पाइब सेल्ब। ५ जोक्ब तुइक्ब नेल्लेमी एको लोव्र रिम्शो पा नेबमी तेम्शा शुश रूपब दुम्नीम। निप्स पाइश्शो मुर जोक्ब दुम्शा, ६ एको देंतीक लोव्र, कथा, जोक्ब तुइक्ब आन लोव्र नु खुइश्शो लोव्र रूपनीम। ७ परमप्रभु यावे कली मान पा हिंचा तुइक्तीक दुम्चा कली गोतीक बाक्ब। मूर्खपुकीमी तुइक्तीके नु अर्ती मदाक्नीम। हितोपदेस ८:१३; हितोपदेस ९:१०; अय्युब २८:२८; भजन संग्रह १११:१०

मरिम्शो पाइब नु मगाक्को

८ आं तौ, इ आफ आ अर्ती नेनो। इम्मा आ शेंशो मप्रोनो। हितोपदेस ६:२०; ब्यवस्था २१:१८-२१ ९ मारेदे हना मेको इ पिया डा ग्योम्तीके नु इ कली सुन के माला नस। १० आं तौ, मरिम्शो पाइब मुरुम इ कली “हेंथे पय” दे लोव्र पास्तेक्म हना, मेको आन लोव्र मबिस्सो। हितोपदेस १६:२६; ब्यवस्था १३:७-९ ११ मेकोपुकीमी “पिवो, मुर साइक्चा कली बाप्शा बाक्य। रिम्शो पाइब कली बाप्शा, १२ मेको कली

बेक्शो मुर आन बाक्तीकेम सोइक्तय। गो मेको कली सेसीन तुरसुम सोइक्तय। १३ मिनु गोपुकीम आ बाक्शो शोंप नेल्ल रोइक्नय। मेको रोइश्शोमी आंम आंम खिं प्रिनय। १४ गे, गोपुकी नु लते हना, नेल्ल गारशा योक्सय” देंतेक्म हना यो, १५ आं तौ, गे मेकोपुकी नु मलावो। मेकोपुकी नु मगाक्को। १६ मारेदे हना मेकोपुकी मरिम्शो गेय पचा कली रीब पा दोरनीम। हुश ख्राक्श पोक्चा कली चुइक्नीम। १७ चिक्बीमी तचा डा पा ब्वारद दाइश्शो शोर गाक्शो गेय बाक्ब। १८ मेको मुरपुकी साइक्चा पुंइसीचा कली बाप्शो बाक्नीम। आंमान खतम दुम्चा कली बाप्शा बाक्नीम। १९ मुर आन मार मार रोइश्शा, तेलसीबपुकी मोदेंशो पा साइक्चा पुंइसीनीम।

तुइक्तीकेमी मुर आन कली अरेब

२० लां मेर तुइक्तीके लोव्र नेसीब। सहर मेर आ सेंदा ग्रूब। हितोपदेस ८:१-३ २१ मेको शुश मुर आन देलतीके मेर ब्रेन्ना ब्रेन्न बाक्ब। सहर ओव्रतीक ठेयब लाप्चोमी आ लोव्र पाइब। २२ मार लोव्र पाइब देंशा हना “गे मारेइ मजोक्बपुकी, गेना सम्म मारेइ मजोक्ब दुम्चा दाक्नीनी? गे शुक्शी पाइबपुकी, गेना सम्म शुक्शी पचा दाक्नीनी? गे मूर्खपुकी, गेना सम्म तुइक्तीके कली काइ मदाक्नीनी? २३ गे आं हुइश्शो लोव्र नेनीन। आं मिम्शो इन कली देंनुड। आं लोव्र इन कली तुइक्पाइक्नुड। २४ मिनु गो इन कली ब्रेत्तुनु, गेपुकीम मननी। गो आं गुइ हामुनु, सुइ मपिनी। यसैया ६५:२, १२ २५ आं अर्ती नेल्ल मटितीके, आं हुइश्शो नेंचा मदाक्तीके, २६ गो यो गे श्येत जनी ना,

रिशशा बाक्नुड। मिनु गे शुश हिंनीना, गो शुक्शी पाइनुड” दे लोव्र पाइब।
 व्यवस्था २८:६३ २७ शुश हिंतीके ठेयब फश खोदेशो पा इन तारी जाक्त हना, श्येत फश गिवार खोदेशो पा इन तार जाक्त हना, श्येत नु हिंतीकेम इन कली सुम्तु हना, २८ मेना आं कली थोनीनु, गो इन कली लोव्र मलेत्नुड। गेपुकीमी आं कली शुश माल्तीनी हना यो, मथित्नीनी।
 यसैया ५६:२; मीका ३:४ २९ मेकोपुकीम जोक्तीक कली काइ मदाक्तीके नु परमप्रभु यावे कली मान मपथु महिंतीके, ३० आं अर्ती मनंतीके, आं हुइशशो नेंचा मदाक्तीके, ३१ मेकोपुकीमी आन आन पशो मरिम्शो गेय आन इनाम तचा माल्नीम। मिनु आन आन मरिम्शो पतीकेमी ब्रीमल। ३२ मारदे हना मारेइ मजोक्ब आन मटितीके साइक्चा पुंडसीनीम। मूर्ख आन मारेइ ममिम्तीके खतम दुम्नीम। ३३ तन्न सु सुम आं लोव्र नेंनीमी, मेकोपुकी श्येत मजाइनीमी। महिंथु, रिम्शो दुम्शा बाक्नीमी।

तुइक्तीकेमी बेक्तीक रे प्रोइब

२ आं तौ, गे आं लोव्र नेनो, आं शेंशो इ थुंम वोइक्तीवी हना, २गे इ नोफा दाइशशा, तुइक्तीक लोव्र नेंतीवी नु रुप्तीके दाक्तीवी हना, ३गे जोक्तीके तुइक्तीक माल्शा, रुप्तीके कली ठेयब सेंदा पा पुंडतीवी हना, याकूब १:५ ४गे मेको कली चांदी खोदेशो पा माल्तीवी नु थिम्शा वोइशशो शोप माल्शो खोदेशो पा दोप्तीवी हना, ५गे परमप्रभु यावे कली दोपा मान पा हिंचा माल्बा, मेको तुइक्ने चाप्नेवे। मिनु गे परमप्रभु कली तुइशशा शेंसीने चाप्नेवे। ६मारदे हना परमप्रभु

यावे तुइक्तीक थुं गेब बाक्ब। आ शोव्र रे जोक्तीक नु रुप्तीक लोव्र गूब।
 दानीएल २:२०-२३ ७मेकोमी रिम्शो थुं पाइशशो मुर आन कली तुइक्तीक थुं गेब। मेको दोस मताइब आन कली तेक्तीके बाक्ब।
 भजन संग्रह ७:११ ८परमप्रभु यावेमी ठीक निसाफ बाक्बा देय मबाक्बा मेको कोव्रब। आ लां गाक्ब आ मुर आन कली कोव्रब। ९मिनु गे ठीक पतीके नु ठीक निसाफ, कुल मकोव्रथु रिम्शो पतीके नु रिम्शो लां मार बाक्मे रुप्नेवे। १०मेना तुइक्तीके इ थुंमी ओव्रब नु इ जोक्तीकेमी इ थुं कली ग्येरपाइक्ब। १कोरिन्थी १:३० ११मिनु होस पतीकेमी इ कली खाल पाइब। रुप्तीकेमी इ कली कोव्रब। १२मेकोमी इ कली मरिम्शो लां नु दूली लोव्र पाइब मुर रे प्रोइब। १३मेकोपुकी रिम्शो थुं पाइशशो मुर आन लांम गाक्चा प्रोइशा, छिडछिड डा लांम गाक्नीमी, १४मेकोपुकी थम मरिम्शो पचा कली ग्येरसीनीम। शुश दूली नु मरिम्शो पतीकेमी ग्येरसीनीम। १५मेको आन पतीक काइ मरिम्शो बाक्ब। हेंथे लां गाक्ब बाक्नीम।

१६होस पतीके नु रुप्तीकेमी इ कली हेंथे पाइब मीश मुर नु आ वाल्चा डा लोव्र रे यो प्रोइब। १७मेकोमी आ ग्युंवे पशो वोंइश कली प्रोइशा, परमप्रभु यावे आ डोंइती पशो कबल प्रेंताक्ब। १८मेको आ खिं ओव्रब नेल्ल बेक्तीक लां लाइनीम। मेको आ खिं डा लां बेक्शो मुर आन बाक्तीक लतीक लां बाक्ब। १९मोदेशो मीश मुर आ बाक्तीक लाइबपुकी गेनायो लेन्ने मचाप्नीम। मिनु ब्रोंइतीक लां यो मताइनीम।

२०मोपतीके रिम्शो मुर आन लां गाक्को। ठीक पाइब आन लां गाक्को।

२१मारदे हना रिम्शो थुं पाइश्शो मुर रागीम बाक्चा ताइनीम। दोस मताइबपुकी रागीम लीनीम। *भजन संग्रह ३७:६; मत्ती ५:५* २२तन्न परमप्रभु यावे आ अरेशो मटीबपुकी आन शाक्श रेन रागी रे तुल्चा पुंडसीनीम। थमा मसुइक्बपुकी सुवा खोदेंशो पा ताइक्चा पुंडसीनीम। *भजन संग्रह ३७:१०*

थमा सुइक्बमी आसीक ताइनीम

३ आं तौ, आं अरेशो मप्रेंदो। मिनु आं शेंशो लोव्व इ थुंमी वोतो। *लेवी १८:५* २मारदे हना मेकोमी इ कली शुश बर्स ब्रोंइतीक नु थम रिम्शो बाक्चा गेनीस। ३गेना हना यो दाक्शा गेनायो मप्रोंइथु, बाक्को। मेको निक्शी कली माला खोदेंशो पा रेल्ला, इ थुंम ब्रेक्शो खोदेंशो पा वोतो। *ब्यवस्था ६:८; येरमीया ३१:३३* ४मो पाप्तीवी हना, गे परमप्रभु आ आसीक ताइनेवे। मुर नेल्लेमी इ कली रिम्शो देंनीम।

५गे इ थुं नेल्लेमी परमप्रभु यावे आ देंशो मिम्शा, थमा सुतो। इ आंम जोक्शो तुइश्शो थमा मसुतो। ६इ पतीक नेल्लेमी “परमप्रभु यावेमी मार दाक्बा” दे मिम्तो। मो पाप्तीवी हना, परमप्रभु यावेमी इ कली ठीक लां कोंइब। ७गे “गो जोक्ब तुइक्ब मुर नड” दे ममिम्तो। तन्न परमप्रभु यावे कली मान पा हिनो। मरिम्शो पतीके रे डोन बाक्को। *यसैया ५:२१* ८मो पाप्तीवी हना, मेको इ रां कली सापाइक्तीके बाक्ब। मिनु इ गुइ खोइल बोल्यो दुम्नीम।

९इ शोंपोमी परमप्रभु यावे कली मान पावो। मिनु इ बाली नाली रे नेल्ल क्येडा डोंइती सिश्शोमी आ नें ठेयब सेलो। *प्रस्थान २३:१६* १०मो पाप्तीवी हना, इ कोठो भकारी अन्नमी शुश ब्रीशो बाक्नीम। इ

अडगुर खाक्तीके अडगुर रसम ब्रीशो बाक्नीम।

११ आं तौ, परमप्रभु यावेमी इ कली देंशो रिम्शो पावो। आ हुइश्शो नेंशा, मरिम्शो मसुतो। *हिब्रू १२:५-६; अय्युब ५:१७-१९* १२मारदे हना परमप्रभु यावेमी आ दाक्शो मुर आन कली ला हुइक्ब। मेकोमी रिम्शो आफोमी आ दाक्शो तौ कली खोदेंशो पा सजाइ गेब। *१कोरिन्थी ११:३२; प्रकाश ३:१६*

तुइक्तीकेमी मुर कली रिम्शो सेल्ब

१३तुइक्तीके ताइब नु रुप्बपुकी ग्येरसीशो मुर बाक्नीम। १४मारदे हना तुइक्तीके चेम्शो चांदी क्येडा शुश रिम्शो बाक्ब। मिनु आ चेम्शो सुन क्येडा यो शुश क्येट लाइब बाक्ब। *हितोपदेस ८:१०* १५तुइक्तीके हीरा क्येडा शुश क्येट लाइब बाक्ब। इ माल्शो मारेइ मारेइ नेल्ल मेको क्येडा आइक्च बाक्नीम। १६मेको आ ग्युरा गुइमी शुश ब्रोंइतीक नाक्त बाक्नीम। आ पेरा गुइमी शोंप नु मान ततीके बाक्ब। १७मेको आ लां रिम्शो नु थुं नाइक्तीके बाक्नीम। १८मेको नु बाक्बपुकी शुश नाक्त ब्रोंइनीम। मेको कली मुप्शा बाक्ब आन पर्वम मुरपुकीमी “मेकोपुकी ग्येरसीशो मुर बाक्नीम” देंनीम। *हितोपदेस ११:३०; हितोपदेस १३:१२; हितोपदेस १५:४*

१९परमप्रभु यावेमी आ तुइक्तीकेमी रागी सेल्लु। आ रुप्तीकेमी सरीड वोइक्तु। *हितोपदेस ८:२२-३१* २०आ जोक्तीकेमी ब्वाक्कु बुक्पाइक्तु। मिनु गोस्स रे फुरश यिपाइक्तु।

२१ आं तौ, आं देंशो गेय पचा क्येडा डोंइती मिम्शा, गेनायो मप्रोनो। ठीक

तुइक्तीके नु होस पतीके गे नु बाक्ल।
 २२ मारदे हना मेको इ ब्रोंइतीक नु इ
 दारस बाक्नीस। २३ मिनु गे इ लांम रिम्शो
 पा गाक्डे नु इ खोइल दाइल मपाइब।
 २४ गे निस्सेनु, हिंचा ममाल्नेवे। इमेनु
 ब्रोत्रशो निन्द्रा पाइनेवे। *भजन संग्रह ३:६*
 २५ शुश हिंचा डा दुम्मेनु, महिनो।
 फश पवानु, परमप्रभु यावे आ अरेशो
 मटीबपुकी खतम दुम्मानु, गे महिनो।
 २६ मारदे हना परमप्रभु यावे गे नु बाक्ब,
 मेकोमी इ खोइल कली रेत्तीक रे प्रोंइब।

हितोपदेस १०:२६

मुर आन कली वारच पावो देंशो

२७ मिनु मुर आन कली गेचा डा गेवो।
 इ गुइमी बाक्त हना, शिम मदुमो। २८ गे नु
 बाक्त हना “दीसा जाक्को। मिनु गेनन”
 दे इ नेक्था डा मुर आन कली मदेनो।

२९ इ नेक्था बाक्ब कली मरिम्शो
 पचा ममिम्तो। मारदे हना इ कली थमा
 सुइश्शा, इ नेक्था बाक्ब। ३० इ कली
 मारेइ मरिम्शो मपथु जिचा मपोक्को।
 ३१ रोइक्ब मुर आ मारेइ मारेइ तशा,
 मवलो। मेको आ लांम काइ मगाक्को।
 ३२ मरिम्शो दूली पाइब तशा, परमप्रभु यावे
 गांग्रा दीब। रिम्शो थुं पाइश्शोपुकी चहिं
 मेको नु बाक्चा ताइनीम। *भजन संग्रह २५:१४*
 ३३ परमप्रभु यावेमी आ अरेशो मटीब आन
 खिं डा मुर आ सराप राइब। तन्न ठीक
 पाइब आन खिंम आसीक राइब। ३४ मिनु
 परमप्रभु यावेमी ठेयब लेशशो शुक्शी
 पाइब मुर आन कली शुक्शी पाइब।
 ब्रेम्शो थुं पाइश्शो आन कली चहिं शिशी
 पाइब। *१ पत्रुस ५:५* ३५ तुइक्ब मुरपुकी मान
 पाइक्चा पुंइसीनीम। तन्न मटीब मूर्खपुकी
 मुने दोक्नीम।

तुइक्तीक थुं रिम्शो बाक्ब

४ आं तौपुकी, आं अर्ती नेनीन। गे
 जोक्ब तुइक्ब दुम्चा कली इन
 नोफा दाइश्शा नेनीन। २ गो इन कली
 रिम्शो पा अरेनुड। आं शेंशो लोत्र
 मप्रोनीन। ३ गो यो आं आफ नु बाक्शो
 बाक्ती। गो आं ममा आ दाक्शो तौ
 बाक्ती। ४ मिनु आं आफोमी आं कली
 “आं लोत्र इ थुंमी वोतो। मिनु आं शेंशो
 टिशा ब्रोनो। *लेवी १८:५* ५ तुइक्तीके मालो
 नु जोक्ब तुइक्ब दुमो। आं देंशो लोत्र
 मप्रोनो। ६ मेको कली मप्रोंइतीवी हना,
 इ कली कोत्रब। मेको कली दाक्ताक्वी
 हना, इ कली खाल पाइब। ७ तुइक्तीके
 आ गोतीक मार बाक्त देंशा हना,
 तुइक्तीके शुश माल्चा माल्नेवे। मार
 ताप्तीवी हना यो, नेल्ल क्येडा ठेयब
 जोक्ब तुइक्ब दुमो। ८ मेको कली ठेयब
 सेलतीवी हना, इ कली ठेयब सेल्ब। गे
 मेको कली मुप्तीवी हना, इ कली मान
 ततीक गेब। ९ मेकोमी इ पिया दारशो
 पा ग्योम्पाइक्ब। इ पिया तारी रिम्शो
 सिरपेच गुक्ब” दे शेंताक्यी।

तुइक्तीकेमी ब्रोंइचा गेब

१० आं तौ, इ नोफा दाइश्शा, आं
 लोत्र नेंशा, ब्रावो। मो पाप्तीवी हना,
 गे शुश ब्रोंइनेवे। *हितोपदेस ३:२* ११ गो
 इ कली तुइक्तीक लां शेंताक्न। गो
 इ कली रिम्शो थुं डा मुर आन लांम
 गाक्पाइक्तन। १२ गे गाक्डेनु, इ कली
 सुइम मतेक्नीम। मिनु दोरते हना, दाइल
 मपांइसीनेवे। १३ अर्ती कली मिम्शा,
 मेको कली मप्रेंदो। मेको कली टिवो।
 मारदे हना मेको इ ब्रोंइतीक बाक्ब।

१४ परमप्रभु यावे आ अरेशो मटीब नु मगाक्को। मरिम्शो पाइब आन लां मगाक्को भजन संग्रह १:१ १५ मेकोपुकी नु मगाक्को। आन लां मलावो। आन लां हेरशा लावो। १६ मारदे हना मेकोपुकी मरिम्शो मपामे सम्म इप्ने मचाप्नीम। मुर कली मथिपदमे सम्म निन्द्रा मपाइनीम। भजन संग्रह ३६:५; मीका २:१ १७ परमप्रभु यावे आ अरेशो मटितीके मेको आन जचा थोव्रक खोदेशो बाक्ब। हुश खाक्श पोक्तीके आन तूचा थोव्रक खोदेशो बाक्ब। १८ तन्न ठीक पाइब आन लां सुनी डा छेडछेड खोदेशो बाक्ब। मेको नाक्ती उइक्थ दुम सम्म बारना बारन शुश छेडछेड दुम्ब। हितोपदेस २४:२० १९ परमप्रभु यावे आ अरेशो मटीब आन लां क्येर नाक्दो डा छिडछिड खोदेशो बाक्ब। मेकोपुकीम मारेइमी दाइल पाइक्नीम, दे मतुइक्नीम। २० आं तौ, आं लोव्र नेनो। इ नोफा दाइशा, आं देशो नेनो। २१ आं लोव्र कली गेना हना यो मिम्तो। मिनु मेको कली इ थुंमी वोतो। २२ मारदे हना सु मेको ताइबा, मेको आ ब्रोंइतीक दुम्ब। मिनु मेको आ रां नेल्ल कली सापाइक्तीक बाक्ब। हितोपदेस ३:८ २३ नेल्ल आन क्येडा इ थुं कली कोव्रडो। मारदे हना मेको रे इ ब्रोंइतीक जाक्ब। २४ इ शोव्र कली मरिम्शो लोव्र पचा मगेवो। हेंथे लोव्र इ क्येडा डोन वोतो।

२५ इ मिक्ची मरिक्थु ठीक पा डोंइती कोव्रडो। सिका मपथु डोंइती गे कोव्रडो। हितोपदेस १७:२४ २६ ठीक लां ला गाक्को। मिनु इ पतीके नेल्ल रिम्शो दुम्नीम। २७ ग्युरा पेरा मलावो। मरिम्शो पतीक नेल्ल रे डोन बाक्को। यहोसु १:७

तेल्लेम क्येडा होस पचा

५ आं तौ, आं तुइक्तीक नेंशा शुश मिम्तो। आं रुप्तीक तुइक्चा कली इ नोफा दाइक्तो। २ मोपा गे होस पा बाक्शा, जोक्शा लोव्र पने चाप्नेवे। ३ हेंथे पाइब मीश मुर आ शोव्र रे खुदो याप्ब। मिनु मेको आ लोव्र तेल क्येडा ग्रेन्देल बाक्ब। हितोपदेस २:१६-१९ ४ नोले मेको मीश मुर ककीर खोदेशो कशो नु निम्फा गे हेशो धार पाइशो तरवार खोदेशो दुम्ब। ५ मेको आ लां बेक्चा कली लुक्च लाइब। मेको बेक्शो मुर आन बाक्तीके लचा कली आंम कली तेक्ने मचाप्ब। ६ मिनु मेको ब्रोंइचा गेब लां रे डोन लाइब। मेको आ लां हेंथे बाक्त्त हना यो, मेकोमी मारेइ मतुइक्ब।

७ मुल आं तौपुकी, आं लोव्र नेनीन। आं देशो लोव्र मनेंशो खोदेशो मपने। ८ मोदेशो मीश मुर क्येडा डोन बाक्कीन। मिनु आ खिं डा लाप्चो आ नेक्था मलने। ९ लाइतीनी हना, गे इन मान अरु आन कली गेशा, साइक्ब आ गुइमी दुम्नीनी। १० मिनु अरु मुरुमी इन शोप नेल्ले जाइनीम। इन श्येत पा चेम्शो मारेइ मारेइ अरु आन खिं लाइब। ११ मिनु नोले गे श्येत जशा, बेक्चा चिक्शा हुकयी पा, रां नेल्ल सोव्रशा गेयशो दुम्नीनी। १२ मिनु गे “गो मारदे परमप्रभु आ शेंशो मपडा, माइ? मारदे आ हुइशो मटिडा माइ? १३ गो आं कली शेंब आन लोव्र मनेंनु। आं कली अर्ती गेब आन लोव्र मटिड। १४ मुल गो खतम दुम्ती। मुर नेल्ल आन तुइक्चा डा पा खतम दुम्ती” देंनेवे। ब्यक्स्था २२:२८-२९ १५ मिनु गे आंम कुवा डा ब्वाक्कु नु आंम बुक्तीके डा ब्वाक्कु तूशो खोदेशो पा गे इ

मीश नु बाक्को। १६इ बुक्शो ब्वाक्कु, लां मेर लचा गेनेवे? अरु मीश रे थिशो आल लांमी बाक्मानु, इ कली रिम्शो दुम्बा? १७इ आल इ के ला दुम्ल। मेको अरु आन के मदुम्ल। १८इ बुक्शो ब्वाक्कुम आसीक तवल। इ ठिटा बाक्की ना ग्युंवे पशो मीश आल नु ग्येरसीशा बाक्को। उपदेसक ६:६ १९मेको दारशो किश्श नु रिम्शो रोकोश खोदेंशो बाक्ब। मेको आ दारस नु दाक्तीकेमी गे गेना हना यो ग्येरशा बाक्को।

२०आं तौ, गे मारदे मारेइ मतुइक्थु हेंथे मीश मुर नु गाक्नेवे? गे मारदे अरु मुर आ मीश कली मुप्नेवे? २१मारदे हना परमप्रभु यावेमी मुर आ पशो नेल्ल ताइब। मेकोमी मुर आन लां नाक्ब। २२परमप्रभु यावे आ अरेशो मटीब मुर आ मरिम्शो पशोमी ग्याइक्चा पुंइसीब। मेको आ पाप आ ग्याइलीमी रेंत्वा पुंइसीब। २३आंम कली चलेने मचाप्थु, हुइश्शो मटितीके मेको बेक्ब। आ मरिम्शो पतीकेम मेको जाम्शा लाइब।

४ ओटा होस पतीके

६ आं तौ, इ नेक्था डा मुर आ जमानी दुम्ते हना, सल्ला पने थुम्शो बाक्ते हना, हितोपदेस ११:१५; हितोपदेस २०:१६; हितोपदेस २२:२६ २गे इ लोव्रमी फ्रेंसीशो बाक्ते हना, गे गुम्चशो बाक्नेवे। ३मुल मार पचा माल्नेवे देंशा हना, गे आंम कली प्रोनो। मारदे हना गे इ नेक्था डा मुर आ गुइमी बाक्नेवे। मेको कली नमो सिमो पा आ डोंइती बाप्पो। ४इप्शा मबाक्को। काइ निन्द्रा मपावो। ५किश्श सिखारी आ गुइ रे ब्रोंइशो नु चिक्ब ग्याइक्ब आ गुइ रे बेरशो खोदेंशो पा, गे यो आंम कली प्रोनो।

६गे अल्से, रकमिक्च आन कली कोव्रडो। आन पशो कोव्रडो। मिनु जोक्ब तुइक्ब दुमो। हितोपदेस १०:४; हितोपदेस २०:४ ७मेको आन कली अरेब, सासन पाइब नु हुकुम पाइब मबाक्तेक्म हना यो, ८मेकोपुकीमी जचा थोव्रक खेक्चा कली खुप्ची ना खुप्नीम। ९गे अल्से, गेना सम्म इप्शा बाक्नेवे? गेना निन्द्रा रे सेंसीशा बोक्नेवे? १०याम का डा निन्द्रा पतीके, याम का डा मुकु जिशा बाक्तीके नु याम का कुचुमी गुइ वोइश्शा, नाइश्शा बाक्तीकेमी, हितोपदेस २४:३३-३४ ११पुडग दुम्तीके खुइ खोदेंशो पा जाक्ब। इन मार मार माल्तीके या कुरशो लडाइ पाइब खोदेंशो पा जाक्ब।

१२हिंचा डा मरिम्शो पाइब नु शोर गाक्शो मुर हेंथे लोव्र पा गाक्नीम। हितोपदेस १०:३१-३२ १३मिक्च रिक्शा, खोइलीमी चाल पा, ब्रेप्चोमी यो चाल पाइनीम। हितोपदेस १०:१० १४मेको आन दूली थुंमी मरिम्शो मिम्नीम। मेकोपुकीमी गेना हना यो मुर आन कली जिपाइक्नीम। १५मोपतीके मेको आन मतुइक्चा डा पा मेको आन तार श्येत जाक्ब। मिनु मारेइ पचा मतथु, खतम दुम्नीम।

१६परमप्रभु यावेमी ६ ओटा थोव्रक काइ मदाक्ब। ७ ओटा थोव्रक पशो तशा ग्रांग्रा दीब। १७मेको मार बाक्नीम देंशा हना, ठेयब लेत्तीके, जोल पतीके, दोस मताइब मुर आन कली हुश खाक्श पोक्तीके, १८मरिम्शो पचा कली मिम्ब थुं, मरिम्शो पचा चुइक्तीके, १९जोल पाइब सांकछी बाक्तीके नु वोबु आन दातेम जिचा पोक्ब काइ मदाक्ब। मेको ७ ओटा थोव्रक बाक्नीम।

वोंइश मुर आन कली अर्ती

२० आं तौ, इ आफ आ अरेशो टिवो, इम्मा आ शेंशो लोव्र मप्रनो। *हितोपदेस १:८*
 २१ मेको गेना हना यो इ थुंम वोतो। मेको कली माला खोदेंशो पा रेलसो। २२ मिनु गे ते लते हना यो, मेकोमी इ कली लां कोंइनीस। गे इप्ते हना, मेकोमी इ कली खाल पाइनीस। गे सेंसेनु, गे नु लोव्र पाइनीस। *भजन संग्रह ११६:१७२* २३ मारदे हना मेको अरेशो बत्ती नु शेंशो छेडछेड बाकनीस। ठीक पचा कली हुइक्तीके ब्रोंइचा गेब लां बाकब। २४ मेकोमी हेंथे गाकब मीश मुर रे डोन बाकपाइकनीम। मिनु हेंथे गाकब ग्युंवे पशो मीश मुर आन ग्रेन्देल लोव्र रे डोन बाकपाइकनीम। *हितोपदेस २:१६* २५ मेको आ दारशो कुल तशा इ थुंमी मवलो। मेको आ कोव्रशोमी इ कली हेंथे मगाकपदल। २६ तेल्लेम आ गाल्च शोब्ले का डा ला बाकब। तन्न ग्युंवे पशो मीश मुर नु बाकचा वोंइश मुर आ ब्रोंइतीक नेल्ल रोइकब। २७ मुरुमी आ कुचुमी मी वोइक्तु हना, आ वा मदुप्बा डा? २८ मुर ब्रशो कोइला तार गाक्त हना, मेको आ खोइली मचोइबा डा? २९ अरु मुर आ मीश नु इप्ब मुर मोदेंशो दुम्शा, सु मेको मीश मुर कली थीबा, मेको सजाइ मतथु, मब्रोंइब। *हितोपदेस ५:८-१४* ३० खुइमी शोव्रलु बेकशा, जचा थोव्रक खुइ पाप्तु हना, मेको मुने मदोकब। ३१ तन्न मेको ग्याइक्चा पुंडसाक्व हना, आ खुइ पशो ७ खेयप तेम्शा थाप्चा माल्ब। मेकोमी आ खिं आ शोंप नेल्ल थाप्चा माल्ब। *प्रस्थान २१:३७* ३२ मोपा मुर आन मीश नु इप्ब, निप्स मपाइशो मूर्ख बाकब। मोदेशो पाइबमी आंम कली खतम सेल्ब।

३३ मेको तुप्चा नु मुने तोक्चा पुंडसीब। मेको आ मुने गेनायो मक्याम्सीब। ३४ मिनु मेको मीश मुर आ वोंइश शुश गाइकब। मिनु मेकोमी क्येक्क लेत्ची नाक्ती मेको कली मारेइ शिशी मपाइब। ३५ मेको कली गिश क्येट गेप्तीवी हना यो, मेकोमी मताकब।

हेंथे पाइब मीश मुर

७ आं तौ, आं लोव्र टिवो। आं शेंशो लोव्र इ थुंम वोतो। २ गे आं अरेशो मप्रेंताक्वी हना, गे ब्रोंइनेवे। आं शेंशो इ मिक्च खोदेंशो पा होस पा वोतो। ३ मेको कली इ ब्रेप्चोम फ्रेंदो। इ थुंमी ब्रेक्शा वोतो। ४ गे तुइक्तीक कली “आं समी ननी” देनो। मिनु जोक्तीक तुइक्तीके कली “आं नेल्ल क्येडा गारब वारच बाकनीनी” दे लोव्र पावो। ५ मो पाप्तीवी हना, मेकोमी इ कली हेंथे पाइब ग्युंवे पशो मीश मुर आ ग्रेन्देल लोव्र रे प्रोंइब। ६ मिनु गोमी आं खिं डा भेल रे कोंवता। गोमी लां गे कोंवता। ७ मिनु गो मार ताता देंशा हना, मारेइ मजोक्ब नु ठिटा आन दातेमी निप्स मपाइशो ठिटा का कली ताता। ८ मेको वोंइश आल लां मेर गाक्शो ताता। मेको हेंथे गाकब मीश मुर आ खिं गे लना लन पशो ताता। ९ गो मेको कली नां रिचावानु, छिडछिड दुम्ची ना ताता। १० मेको मीश मुर मेको कली ग्रुम्चा कली गूत। तेल्लेम खोदेंशो पा फेक्शा “मेको कली हेंथे खोइक्पाइकुड” दे मिम्शो बाक्त। ११ मेको मीश मुर मारेइ महिंब नु मुने मपाइब बाकब। मेको गेनायो आ खिंम बाकचा मदाकब। १२ मिनु मेको लां एर ओंथ, शुश मुर बाक्तीके मेरे हिरशा, कुना मेर रिम्ना रिम्न बाकब।

१३मिनु मेको मीश मुरुमी मेको कली ग्याइशशा, पुक्पु पा मुने मपथु १४“गो मुलाक्ती दुशा बाक्चा आ पर्वम चढेतीके चढेचा माल्शो नड। मेको आं कसम मुलाक्ती खाप्ता। लेवी ७:१५-१७ १५मोपतीके गो इ कली ग्रुमथ जाक्ती। गो इ कली शुश माल्शा थित्ता। १६गो आं ब्राख्येमी बरखी ब्राता। मेको इजीप्त रागी डा श्येलेम प्रोव्रशो बाक्ब। १७गो आं ब्राख्येमी मूरे, एलोव्र नु सिन्कौलीमी ब्रोव्रशो रिना पपाइक्ता। १८पिवो। गो निक्शी इप्स। नेल्ल नाक्दो काथा ग्येरसीशा इप्स। १९मारदे हना आं वोंइश खिंमी मबाक्ब। मेको डोन लत। २०मेको शुश क्येट कुरसीशा लत। मोपतीके पूर्ने सम्म मजाक्ब” देंत।

२१मोपा शुश लेम्शा, मेकोमी वोंइश आल कली लाइक्तु। आ मिलो शिलो लोव्रमी मेको कली हेंथे खोइक्पाइक्तु। २२मिनु मेको वोंइश आल मेको मीश मुर आ नोले रीब पा खोइक्तु। क्योरचा कली खुल्शो ब्यफ खोदेशो पा गाक्त। ब्वारदमी रेट्चा कली प्रेक्शो किश्श खोदेशो पा मेको आ नोले लत। २३मिनु ब्राम ख्रशा, बेक्चा सम्म रिम्ब। चिक्ब ब्वारदम रेट्चा चिक्शो खोदेशो पा “बेक्नुड” दे मतुइक्ब।

२४मुल आं तौपुकी, आं लोव्र नेनीन। इन नोफा दाइशशा, आं लोव्र नेनीन। २५इन थुं मोदेशो मीश मुर आ लांम लचा मगेने। मेको आ हेंथे लां मलने। २६मेकोमी शुश मुर आन कली खतम सेल्लु। आ साइशशा शुश बाक्नीम। २७मेको आ खिं बेक्शो मुर आन बाक्तीक लतीक लां खोदेशो बाक्ब। मेको लां बेक्तीक कोठा जाक्दीप्ब।

तुइक्तीके ठेयब बाक्ब

तुइक्तीकेमी लोव्र मपाइबा डा? रुप्तीकेमी ठेयब सेंदा पा मब्रेप्बा डा? हितोपदेस १:२०-२३ २मेको लां आ नेक्था डा डांडा तारी नु ब्रालाम दोक राप्ब। ३ठेयब लाप्चो आ नेक्था सहर आ डोंइती, मेको आ ओव्रतीकेमी ठेयब सेंदामी ग्रीब। ४मार देंशा ग्रीब देंशा हना, मुरपुकी, गो इन कली लोव्र पाइनुड। मुर नेल्ल आन कली लोव्र पाइनुड। ५मारेइ मजोक्बपुकी होस पतीके शेंसीन। निप्स मपाइशशा बाक्तीनी हना, निप्स पाइशशा दुमीन। ६नेनीन, गो रिम्शो लोव्र पाइनुड। आं लोव्र ठीक बाक्ब। ७गो थमा लोव्र ला पाइनुड। परमप्रभु यावे आ अरेशो मटितीके तशा, गो ग्रांग्रा दीनुड। ८गो ठीक लोव्र ला पाइनुड। दूली नु हेंथे लोव्र मपाइनुड। ९मिनु मेको आं लोव्र रुप्व आन कली मखुइशशा लोव्र बाक्ब। जोक्ब आन कली ठीक लोव्र बाक्ब। १०चांदी आ पा डा आं अर्ती खुप्तीन। क्येख सुन आ पा डा जोक्ब थुं मालीन। हितोपदेस ३:१४ ११मारदे हना हीरा क्येडा तुइक्तीके रिम्शो बाक्ब। इ माल्शो मारेइ मारेइ नेल्ल मेको क्येडा आइक्च बाक्नीम। १२गो तुइक्तीके नड। गो होस पतीक नु बाक्नुड। गो जोक्ब नु मिम्ब दुम्नुड। १३परमप्रभु यावे कली मान पा हिंचा, मरिम्शो पचा कली काइ मदाक्चा बाक्ब। फुरती कोंइचा, ठेयब लेशशा दुम्चा, मरिम्शो थुं डा गेय पचा नु दूली लोव्र पचा काइ मदाक्नुड। १४अर्ती नु ठीक पा तुइक्तीक गो नु बाक्नीस। गो नु जोक्तीक तुइक्तीक नु बोल यो बाक्नीम। १५गो रे पा पिपुकीमी सासन पाइनीम। हुकुम पाइबपुकीमी ठीक

पा अरेतीक लोत्र पाइनीम। *हितोपदेश १६:१२*
१६ आं पतीकेमी रागी रागी डा हुकुम
 पाइबमी हुकुम पाइनीम। **१७** सुमी आ
 कली दाक्नीमी, गो यो मेको आन कली
 दाक्नुड। सुम आं कली शुश माल्नीमी,
 मेकोमी आं कली थित्नीम। **१८** शोंप नु
 मान गो नु बाक्नीस। मिनु मनुष्य शोंप नु
 सोशा बोशा ग्येत्थ लतीक गो नु बाक्नीस।
१९ सुन नु क्येख सुन क्येडा आं गेशो
 फल रिम्शो बाक्ब। आं रे पा गूशो मारेड
 मारेड चांदी क्येडा रिम्शो बाक्नीम। **२०** गो
 ठीक पतीक लां गाक्नुड। ठीक निसाफ
 पाइनुड। **२१** आं कली दाक्ब आन कली
 गो शुश शोंप गेनुड। गो मेको आन मार
 मार वोइक्तीक नेल्ल प्रिंशा गेनुड।

२२ मिनु मेकोमी “परमप्रभु यावेमी नेल्ल
 सेल्चा क्येडा डोंइती आं कली सेल्ती।
अय्युब २८:२३-२८ **२३** नेल्ल क्येडा डोंइती
 डा गो नड। रागी क्येडा डोंइती यो गो
 नड। **२४** समुन्द्र दुम्या क्येडा डोंइती
 गो नड। ब्वाक्कु बुक्चा क्येडा डोंइती
 गो बाक्ती। **२५** डांडापुकी दुम्या क्येडा
 डोंइती नु पहाड दुम्या क्येडा डोंइती
 गो नड। **२६** मेकोमी रू नु रागी सेल्चा
 क्येडा डोंइती गो नड। खप सेल्चा क्येडा
 डोंइती गो नड। **२७** मेकोमी सरीड प्राक्शा
 वोइक्ची ना गो नड। **२८** गोस्स कली
 सरीडमी वोइक्ची ना नु खप आगा डा
 ब्वाक्कु बुक्तीके कली ठीक पा वोइक्चा
 ना, **२९** ठेयब समुन्द्र आ शुंडच वोइक्ची
 ना नु रागी आ जग वोइक्ची ना गो नड।
भजन संग्रह १०४:६ **३०** मेना गो परमप्रभु यावे
 आ नेक्था जोक्ब तुइक्ब गेय पाइब
 खोदेशो पा बाक्शो नड। मेकोमी नाक्त
 किंत किंत आं कली तशा ग्येरसाक्व। गो
 यो मेको नु ग्येरसीशा बाक्ती। **३१** मिनु आ

मुरपुकीम ब्रीशो रागी तशा ग्येरसाक्वी।
 गो मुर आन कली तशा ग्येरसाक्वी।

३२ आं तौपुकी, मुल आं लोत्र नेनीन।
 आं कोंइशो लां गाक्बपुकी ग्येरसीशो
 मुर दुम्नीम। **३३** आं अर्ती नेंशा जोक्ब
 तुइक्ब मुर दुमीन। मेको कली मप्रोनीन।
३४ सुम आं लोत्र नेंबा, मेको ग्येरसीशो मुर
 दुम्ब। मेको मुरुम नाक्त किंत किंत आं
 लाप्चो कोव्रशा आं कली रिम्ब। **३५** सुम
 आं कली थिप्बा, मेको ब्रोंइचा ताइब।
 मिनु परमप्रभु यावेमी मेको कली दाक्ब।
३६ आं कली मथिप्बपुकी चहिं आम
 कली खतम सेल्नीम। आं कली काइ
 मदाक्ब नेल्ले बेक्चा दाक्नीम” दंत।

तुइक्तीके नु मारेड मतुइक्तीके

६ तुइक्तीकेमी आम खिं सेल्शा,
 ७ ओटा थाम खुक्तु। **२** मेकोमी
 भोज सेल्लु अडगुर शांबु ब्रोंवपाइशशा,
 राडी ब्रशा, जचा कली ठीक पशो
 बाक्त। **३** आ वाइलीम आन कली “सहर
 डा डांडा रे मुर आन कली ब्रेत्तीन” दे
 सोइक्ताक्व। **४** “मारेड मजोक्ब नेल्ल
 एक जाक्कीन” दंत। निप्स मपाइशो
 आन कली **५** “जाक्कीन, आं शोब्ले जने।
 आं ब्रोंव पा सेल्शो शांबु यो तूडीन” दंत।
६ क्येख मुर आन लां गाक्चा प्रोनीन। मिनु
 जोक्ब तुइक्ब आन लां गाक्शा, ब्रोंइशा
 बाक्कीन।

७ सुमी शुक्शी पाइब आन कली “रिम्शो
 दुमो” देंबा, मेको दिप्चा पुंडसीब। सुमी
 परमप्रभु यावे आ अरेशो मटीब आन कली
 हुइक्बा, मेको मरिम्शो पाइक्चा पुंडसीब।
८ सुमी शुक्शी पाइब आन कली हुइक्बा,
 मेको काइ मदाक्चा पुंडसीब। सुमी चहिं
 जोक्ब तुइक्ब आन कली हुइक्बा, मेको

दाक्चा पुंडसीब। ६जोक्ब तुइक्ब आन कली अर्ती गेशोन, डोंइती क्येडा जोक्ब तुइक्ब दुम्नीम। ठीक पाइब आन कली शेंशोन, मेको क्येडा ठीक पचा शेंसीनीम।

१०परमप्रभु यावे कली मान पा हिंचा जोक्तीक तुइक्तीक गोतीक बाक्ब। मिनु सुमी मेको का ला परमप्रभु यावे कली तुइक्बा, मेको रुप्ब दुम्ब। *हितोपदेस १:७* ११मारदे हना आं पतीकेमी गे शुश नाक्ती ब्रोंइनेवे। इ ब्रोंइतीक शुश बर्स तेम्चा पुंडसीनेवे। १२गे जोक्ब तुइक्ब दुम्ते हना, मेको इ कलीन दुम्ब। गे शुक्शी पाइब दुम्ते हना, मेको रे पिशो दोस नेल्ल इ केन बाक्ब।

१३मूर्ख मीश मुर शुश रेयके पाइब। मेको मारेइ मजोक्ब नु मारेइ मतुइक्ब बाक्ब। १४मेको आ खिं डा लाप्चोमी निप्ब। सहर आ इर डा नित्तीकेमी निप्ब। १५सु सु आन गेय पा मेको लां गाक्नीमी, मेकोमी मेको आन कली ब्रेप्ब। १६मिनु “सु सु मारेइ मजोक्ब बाक्नी, एक जाक्कीन” देंब। मिनु मेकोमी निप्स मपाइशो आन कली १७“खुइ पशो ब्वाक्कु ब्रोत्रशो बाक्ब। मिनु खुइइशा जशो जचा थोत्रक यो थाम्पा ब्रोत्रब” देंब। *हितोपदेस २०:१७* १८मिनु मेको लां गाक्ब मुरपुकीमी “मेको आ खिं बेक्शो मुर आन बाक्तीके बाक्ब” दे मतुइक्नीम। मिनु मेको आ पौनामी आन कली बेक्शो मुर आन बाक्तीकेमी ब्रेशो बाक्नीम, दे मतुइक्नीम।

सोलोमन आ ब्रेक्शो लोत्र

१० जोक्ब तुइक्ब तौमी आ आफ कली ग्येरपाइक्ब। तन्न मूर्ख तौमी चहिं आ ममा कली सुर्ता पपाइक्ब।

२परमप्रभु यावे कली मटिथु, चेम्शो शोंप शोर गाक्ब। सु ठीक पाइब बाक्मे मेको बेक्तीक रे ब्रोंइब। ३परमप्रभु यावेमी ठीक पाइब मुर आन कली शोत्रलु बेक्पाइशो मवोइक्ब। तन्न आ अरेशो मटीब आन कली आन जत दाक्शो मगेब।

भजन संग्रह ३७:१६, २५ ४सु अल्से बाक्मे, मेको प्रुडग दुम्ब। शुश गेय पाइब मुर चहिं शोंप पाइशो दुम्ब। *हितोपदेस ६:६* ५सु अन्न खुप्ची ना खुप्बा, मेको होस पाइब तौ का बाक्ब। अन्न रुप्ची ना इप्ब तौमी आ आफ कली मुने तोक्ब। ६ठीक पाइब मुर आसीक राइनीम। तन्न परमप्रभु यावे आ अरेशो मटीब आन कली आन मरिम्शो पशोमी सुम्ब। ७ठीक पाइब कली मिम्शा आसीक गेब। परमप्रभु यावे आ अरेशो मटीब आन नें चहिं जाम्शा लाइब।

अय्युब १८:१७; भजन संग्रह ६:६ ८जोक्ब तुइक्ब थुं पाइशो मुरुमी शेंशो लोत्र टीब। तन्न हेथे लोत्र पाइब मूर्ख खतम दुम्ब। ९गेना हना यो रिम्शो पाइब मुर कली सुइमी मारेइ मपाइनीम। सु चहिं दूली लां गाक्बा, मेको आ पबर्म नेल्लेमी “मरिम्शो पाइब” दे तुइक्नीम। १०मिक्च रिक्बपुकीमी मुर आन कली श्येत गेनीम। तन्न सुमी महिंथु हुइक्बा मेकोमी थुं नाइशो बाक्चा गेब।

हितोपदेस ६:१२-१३ ११ठीक पाइब मुर आन लोत्र पतीकेमी ब्रोंइनीम। तन्न परमप्रभु यावे आ अरेशो मटीब आंम आन लोत्र पतीकेमी खतम दुम्नीम। १२मुर आन कली काइ मदाक्शोन, जिचा बोक्ब। मुर आन कली दाक्शोन चहिं, आन मरिम्शो पशो नेल्ल सुम्सीब। *१पत्रुस ४:८* १३मिम्ब मुर आन लोत्र रुप्चा डा बाक्ब। तन्न ममिम्ब मुरपुकी तुप्चा पुंडसीनीम। १४जोक्ब तुइक्ब मुर नु जोक्तीक बाक्ब। तन्न

हेंथे लोव्र पाइब मूर्खमी खतम दुम्तीक चाकब। १५ शोंप पाइश्शो मुर आन शोंप मेको आन बोल्यो दरवार खोदेशो बाकब। पुडग मुर आन श्येत दुम्तीकेम मेको आन कली खतम सेल्ब। *हितोपदेस १८:११*

१६ ठीक पाइब मुर आन गेय पतीकेमी ब्रोंइनीम। परमप्रभु यावे आ अरेशो मटीब आन चेम्शो नेल्ल मरिम्शो गेय पा नुष्शा लाइब। १७ सु सुमी अर्ती टीनीमी, मेको ब्रोंइचा गेब लां गाकनीम। हुइश्शो मनेंब चहिं हेंथे लां गाकनीम। १८ सुमी मुर काइ मदाकबा, तन्न “दाक्नुड” देबा, मेको मुर जोल्फे बाकब। सुम मुर आन पर्वम जोल फ्राइबा, मेको मूर्ख बाकब। १९ शुश लोव्र पाइब मुरपुकीमी शुश गलती पाइनीम। होस पाइब मुर शुश मब्वाकनीम। २० ठीक पाइब मुर आन लोव्र रिम्शो चांदी खोदेशो बाकब। परमप्रभु यावे आ अरेशो मटीब आन थुं शोर गाकशो बाकब। २१ ठीक पाइब मुर आन लोव्रमी शुश मुर आन कली रिम्शो दुम्ब। तन्न मूर्ख आन निप्स मपाइक्तीके बेकशा लाइनीम। २२ परमप्रभु यावे आ आसीकम मुर आन कली शोंप पाइश्शो सेल्ब। मेकोमी मारेइ श्येत मतेम्ब। *भजन संग्रह १२७:२*

२३ मूर्ख मरिम्शो पचा कली ग्येरसीनीम। रुब्ब मुर जोकब तुइक्ब गेय तशा ग्येरसीनीम। २४ परमप्रभु यावे आ अरेशो मटीब मुर आन हिंशोम श्येत जाइनीम। तन्न ठीक पाइब मुर आन दाकशो ताइनीम। *हितोपदेस १:२७; भजन संग्रह ३७:४*

२५ श्येत फश गिवार खोदेशो पा जाकमेनु परमप्रभु यावे आ अरेशो मटीबपुकी जाम्शा लाइनीम। तन्न ठीक पाइब मुर गेना हना यो ब्रोंइशा बाकनीम। *हितोपदेस १२:७*

२६ दोपा ग्युरशोमी खुइ ग्रिम्बा नु कुनमी मिक्च

दुक्बा, मोपा अल्सी पाइब आन होव्रप आन कली दुम्नीम। २७ परमप्रभु यावे कली मान पा हिंतीकेमी ब्रोंइतीक नाक्त तेम्सीब। तन्न परमप्रभु यावे आ अरेशो मटीब आन ब्रोंइतीक नाक्ती खोंइसीब। २८ ठीक पाइब आन आस पतीके तशा ग्येरसीनीम। तन्न परमप्रभु यावे आ अरेशो मटीब आन आस पतीके जाम्शा लाइब। *भजन संग्रह ६:१६; अय्युब ८:१३*

२९ परमप्रभु यावे आ लां रिम्शो थुं पाइश्शो मुर आन कली खुइश्शा ब्रोंइशा बाक्तीक बाकब। तन्न मरिम्शो पाइब आन कली मेको लां खतम दुम्तीक बाकब। ३० ठीक पाइब मुर गेनायो ग्येत्थ लुकच मदुम्नीम। परमप्रभु यावे आ अरेशो मटीबपुकी चहिं रागीमी मलीनीम। *हितोपदेस २:२२*

३१ ठीक पाइब मुरुमी तुइक्तीक लोव्र पाइब। तन्न दूली लोव्र पाइब मुर आ लें फेत्चा पुंइसीब। *भजन संग्रह ३७:३०*

३२ ठीक पाइब मुरुमी रिम्शो लोव्र पस जोकब। तन्न परमप्रभु यावे आ अरेशो मटीबपुकी दूली ला ब्वाक्स जोकनीम।

गेब मुरुमी तेम्शा गेचा पुंइसीब

११ परमप्रभु यावेमी जोल पा नाक्तीक तशा, ग्रॉग्रा दीब। तन्न ठीक नाक्तीक तशा शुश ग्येरसीब। *लेवी १६:३५-३६*

२ ठेयब लेशशो मुर मदाकचा पुंइसीब। तन्न तुइक्तीक ब्रेम्शो मुर नु बाकब। *हितोपदेस १६:१८*

३ रिम्शो थुं पाइश्शो मुर आन कली गेना हना यो आन रिम्शो पतीकेमी लां कोइब। तन्न थमा सुइक्चा मपुंइसीब मुर आन कली आन मरिम्शो पतीकेमी खतम सेल्ब। ४ गाइश्शो नाक्ती शुश शोंप शोर गाकशो दुम्ब। तन्न ठीक पतीकेमी बेक्तीक रे प्रोंइब। *लूका १२:२०;*

हितोपदेस १०:२ ५ दोस मताइब आन ठीक पतीकेमी मेको आन लां थेल्व। तन्न परमप्रभु यावे आ अरेशो मटीब आन मटितीकेमी खतम दुम्नीम। ६ रिम्शो थुं पाइश्शो मुर आन ठीक पतीकेम ब्रोंइचा ताइनीम। तन्न थमा सुइक्चा मपुंडसीब मुर आन मरिम्शो पतीकेमी ग्याइक्चा पुंडसीनीम। ७ परमप्रभु यावे आ अरेशो मटीब मुर बेक्मानु, आन आस यो जाम्शा लाइब। मेको आन मिम्शो नेल्ल मदुम्ब। हितोपदेस १०:२८ ८ ठीक पाइब मुर हिंचा डा श्येत रे प्रोंइचा पुंडसीनीम। तन्न परमप्रभु यावे आ अरेशो मटीबपुकी मेको श्येतमी हुम्सीनीम। ९ मरिम्शो मुर आन लोव्रमी आन नेक्था डा मुर आन कली खतम सेल्नीम। तन्न ठीक पाइब मुर मेको आन जोक्तीकेमी प्रोंइचा पुंडसीनीम। १० ठीक पाइब मुर आन कली रिम्शो दुम्त हना, सहर डा मुर नेल्ल ग्येरसीनीम। परमप्रभु यावे आ अरेशो मटीब खतम दुम्मानु, मुर नेल्ल थाम्पा ग्येरसीनीम। ११ रिम्शो थुं पाइश्शो मुर आसीक तामेनु, सहर कली रिम्शो दुम्ब। तन्न परमप्रभु यावे आ अरेशो मटीब आन लोव्रमी सहर कली मरिम्शो दुम्ब। हितोपदेस २८:१२ १२ सुमी अरु मुर आन कली आइक्च सेल्बा, मेको निप्स मपाइश्शो बाक्ब। तन्न निप्स पाइश्शो मुर सिक्सी पा बाक्ब। भजन संग्रह १५:३ १३ लोव्र क्याल्बमी खुइश्शो लोव्र यो फ्राइनीम। तन्न थमा सुइक्चा पुंडसीब मुरुमी मोदेशो लोव्र खाप्शा वोइक्नीम। १४ लां कोंइब मबाक्त हना, रागी खतम दुम्ब। तन्न अर्ती गेब शुश बाक्तेक्म हना, मेको लीब। १५ अरु मुर आन जमानी बाक्शोनु, मरिम्शो दुम्ब। तन्न जमानी मबाक्शो रिम्शो दुम्ब।

हितोपदेस ६:१-२ १६ रिम्शो थुं पाइश्शो मीश मुर कली मान पाइनीम। तन्न मरिम्शो पाइब मीश मुनेमी सुम्सीशो बाक्ब। गेय मपाइब मुर प्रुडग दुम्ब। तन्न आंट पा गेय पाइबमी क्येट चेम्ब। १७ रिम्शो पाइब मुरपुकीमी आंम कली रिम्शो पाइनीम। तन्न मरिम्शो पाइबपुकी श्येत गेंसीनीम। १८ परमप्रभु यावे आ अरेशो मटीब मुरुमी क्येट चेम्ब, तन्न मलीब। तन्न ठीक पाइब मुरुमी इनाम ताइनीम। १९ सु गेना हना यो ठीक पाइब बाक्बा, मेको ब्रोंइब। तन्न सु मरिम्शो पचा कली चुइक्बा, मेको बेक्ब। हितोपदेस १६:२३ २० मरिम्शो थुं परमप्रभु यावे कली ग्रांग्रा बाक्ब। तन्न दोस मताइब रिम्शो थुं पाइश्शो मुर आन लां गाक्शो तशा ग्येरसीब। २१ मरिम्शो पाइब मुर सजाइ मतथु मब्रोंइनीम। मेको थमा बाक्ब। तन्न ठीक पाइब आन चच युइ ब्रोंइचा ताइनीम। २२ निप्स मपाइश्शो दारशो मीश मुर सुन के मुन्द्री पांइशो पोव्र खोदेशो बाक्ब। हितोपदेस ३१:३० २३ ठीक पाइब मुर आन दाक्शो थमा पा ताइनीम। परमप्रभु यावे आ अरेशो मटीबम गाइक्पाइक्नीम। २४ का निक्शी मुरुम शुश गेनीम हना यो, आन शोंप मेको क्येडा बारब। का निक्शी चहिं आन गेचा माल्शो मगेथु, प्रुडग दुम्नीम। मती २५:२६; २कोरिन्थी ६:६ २५ हाइश्शो मुरुमी शुश ताइब। सुम अरु आन कली वारच पाइक्बा, मेकोमी आंमा यो वारच पाइक्चा पुंडसीब। २६ अरु आन कली अन्न मगेथु खेक्शा वोइक्ब मुर सराप पाइक्चा पुंडसीब। तन्न अन्न लेयब मुर आसीक ताइब। २७ सुम रिम्शो पतीके माल्शा पाइबा, मेकोमी शिशी माल्ब। सुम मरिम्शो पतीके माल्बा, मेको मरिम्शो

पाइक्का पुंडसीब। **२८** सुमी आ शोप कली थमा सुइक्का, मेको रीब पा बेक्क। ठीक मुर चहिं गिग घांस खोदेशो पा बारशा लाइब। *भजन संग्रह ५२:६-१०* **२९** आंम खिं डा मुर आन कली श्येत चाक्कमी मारेइ मथेरब। मिनु मूर्खपुकी जोक्क तुइक्क आन वाइल दुम्नीम। **३०** ठीक पाइब मुर आन पतीके ब्रोंइचा गेब रवा खोदेशो बाक्क। तन्न हुश ख्राक्क पोक्कमी मुर आन कली साइक्क। *हितोपदेस ३:१८* **३१** ठीक पाइब मुरपुकीम रागीम बाक्कमानु, आन ठीक पशो डा इनाम ताइनीम। परमप्रभु यावे आ अरेशो मटीब नु मरिम्शो पाइबपुकीमी यो आन मरिम्शो पशो डा इनाम ताइनीम। *१पत्रुस ४:१७-१८*

परमप्रभु आ अरेशो टिचा माल्शो

१२ सु सुमी शेंसीतीके दाक्नीमी, मेकोमी जोक्तीक दाक्नीम। सुमी हुइक्तीक काइ मदाक्नीमी, मेको निप्स मपाइश्शो बाक्नीम। *हितोपदेस १३:१; हितोपदेस १३:१८* **२** परमप्रभु यावेमी रिम्शो पाइब मुर आन कली दाक्क। दूली मिम्शा हेंथे पाइब आन कली चहिं दोस गेब। **३** परमप्रभु यावे आ अरेशो मटीब रिम्शो मबाक्नीम। तन्न ठीक पाइब बोल्यो शाक्क पाइश्शो रवा खोदेशो बाक्नीम। **४** रिम्शो मीश आ वोंइश आ सिरपेच खोदेशो बाक्क। मुने तोक्क मीश चहिं आ वोंइश कली राक्को रुश खोदेशो बाक्क। *हितोपदेस ३१:१०-३१* **५** ठीक पाइब मुर आन मिम्शो ठीक बाक्क। तन्न परमप्रभु यावे आ अरेशो मटीब आन अर्ती चहिं दूली बाक्क। **६** परमप्रभु यावे आ अरेशो मटीब आन लोव्र मुर साइक्कीक बाक्क। तन्न रिम्शो थुं पाइश्शो मुर आन लोव्रमी

मेको आन कली प्रोंइब। **७** परमप्रभु यावे आ अरेशो मटीबपुकी बेक्का जाम्शा लाइनीम। ठीक पाइब नु मेको आन खिं डा मुर नोले सम्म लीनीम। *हितोपदेस १०:२५* **८** निप्स पाइश्शो मुरपुकी मान ताइनीम। दूली थुं पाइश्शो मुर आन कली चहिं महिक्नीम। **९** “ठेयब मुर नड” देखु पा जचा मताइब मुर दुम्चा क्येडा महिक्सीशो दुम्शा, वाइल का बाक्को रिम्शो बाक्क। **१०** ठीक पाइब मुरपुकीमी आंम बी ब्यफ, क्यारश भेडा आन कली रिम्शो कोव्रनीम। तन्न परमप्रभु यावे आ अरेशो मटीबपुकीमी शिशी मपाइनीम। *प्रस्थान २३:५* **११** सु सुमी आंम रूम शोक्नीमी, मेकोमी जचा शुश ताइनीम। तन्न सु सुमी शोर गाक्को लोव्र पा गाक्नीमी, मेको निप्स मपाइश्शो बाक्नीम। *हितोपदेस २८:१९* **१२** परमप्रभु यावे आ अरेशो मटीबपुकी रोइश्शो थोव्रकीम आस पाइनीम। तन्न ठीक पतीके आ शाक्कम फल सिप्पाइक्क। **१३** मरिम्शो पाइब मुर आंम मरिम्शो लोव्रमी ग्याइक्का पुंडसीनीम। तन्न ठीक पाइब मुर श्येत रे ब्रोंइचा ताइनीम। **१४** मुरपुकी आंम लोव्रम पतीके मान ताइनीम। मिनु गेय पाइब मुरपुकीमी आन गेय डा इनाम ताइनीमी। *हितोपदेस १८:२०* **१५** मूर्खपुकी आंम लां नेल्ले “ठीक बाक्क” दे मिन्नीम। तन्न जोक्क तुइक्कमी अर्ती नेंनीम। **१६** मूर्खपुकीमी आन गाइक्का रीब पा कोइनीम। तन्न होस पाइश्शो मुर कली मरिम्शो लोव्र पाम्तेक्क हना यो, सिक्सी पा बाक्क। **१७** सुमी थमा लोव्र पाइबा, मेकोमी ठीक पतीके कोइब। तन्न जोल पाइब सांक्कीमी गेना हना यो दूली लोव्र पाइब। **१८** मुर आन ममिम्थु पशो लोव्रमी तरवार

खोदेशो पा थोक्ब। तन्न जोक्ब तुइक्ब मुर आन लोव्रमी सापाइक्ब। *हितोपदेस १३:३* १६थमा लोव्र पाइब मुर गेना हना यो लीनीम। तन्न जोल पाइब मुर याम का ला लीनीम। २०मरिम्शो मिम्ब आन थुंमी जोल ला बाक्ब। तन्न थुं नाइक्तीक अर्ती गेब ग्येरशा बाक्नीम। २१ठीक पाइब मुर आन कली श्येत मदुम्ब। तन्न परमप्रभु यावे आ अरेशो मटीब आन कली श्येतम गिल्शो बाक्नीम। २२परमप्रभु यावेम जोल पाइब आन कली तशा ग्रांग्रा दीब। जोल मपथु, आ अरेशो टीब आन कली तशा ग्येरसीब। २३निप्स पाइशो मुरुमी आ तुइशो मकोइब। तन्न मूर्खमी मूर्ख लोव्र पाइब। २४शुश गेय पाइब मुर हुकुम पाइब दुम्नीम। तन्न अल्सी पाइब चहिं वाइल दुम्नीम। २५सुर्ता पतीकेम मुर आन थुं लुक्च लपाइक्ब। तन्न रिम्शो लोव्रमी मेको आन कली ग्येरपाइक्ब। *हितोपदेस १६:२४* २६ठीक पाइबपुकीमी आन वारच आन कली रिम्शो अर्ती गेनीम। तन्न परमप्रभु यावे आ अरेशो मटीबपुकीमी दूली लां कोंइनीम। २७अल्से सिखारीम सिखार मताइनीम। तन्न शुश गेय पतीकेमी मुर आन कली शोप पाइशो सेल्ब। २८ठीक पतीक लांमी ब्रोंइतीक बाक्ब। मेको लां गाक्बपुकी मबेक्नीम।

ब्रोंइचा गेब मार बाक्बा?

१३ जोक्ब तुइक्ब तौमी आ आफ आ शेंशो दाक्ब। तन्न शुक्शी पाइबमी हुइशो मनेंब। *हितोपदेस १:८; हितोपदेस १२:३* २आन लोव्रम पतीके मुरपुकीम मारेइ मारेइ रिम्शो ताइनीम। तन्न थमा मसुइक्चा डा मुरपुकी दूली पचा ला दाक्नीम। ३मिम्शा लोव्र

पाइब मुरुम आम कली ब्रोंइपाइक्नीम। तन्न ममिम्थु ब्वाक्बपुकीमी आम कली खतम सेल्नीम। *हितोपदेस १२:१८; हितोपदेस २१:२३* ४अल्सेपुकी वालनीमी। मिनु मारेइ मताइनीम। तन्न शुश गेय पाइब मुरपुकीमी मारेइ मारेइ ताइनीम। ५ठीक पाइब मुरुमी जोल मदाक्नीम। तन्न परमप्रभु यावे आ अरेशो मटीब मुरुमी मुने दोक्चा डा नु दोस तचा डा गेय ला पाइनीम। ६ठीक पतीकेमी रिम्शो थुं पाइशो मुर आन कली कोव्रब। तन्न परमप्रभु यावे आ अरेशो मटीब आन पाप पतीकेमी मेको आन कली खतम सेल्ब। ७का निक्शी मुर प्रुडग बाक्शा यो “क्येट थीब नड” देखु पाइनीम। का निक्शी मुर चहिं क्येट थीब बाक्शा यो “प्रुडग नड” देखु पाइनीम। *प्रकाश २:६; प्रकाश ३:१७* ८शुश शोप बाक्शो मुरुमी आम कली प्रोंइने चाप्ब। तन्न प्रुडगपुकी हिंच कोंइचा मपुंडसीनीम। ९ठीक पाइब मुर बत्ती खोदेशो छेडछेड पा ब्राइनीम। तन्न परमप्रभु यावे आ अरेशो मटीब आन बत्ती काप्शा लाइब। *अय्युब १८:५-६* १०ठेयब लेशो नु सुइ कली ममिम्ब मुर जिचा पोक्ब बाक्ब। तन्न अर्ती नेंब मुर तुइक्तीके नु बाक्ब। *हितोपदेस १:५* ११मरिम्शो पा चेम्शो शोप नुप्शा लाइब। तन्न इच्का इच्का पा चेम्शो शोप बारना बारन लाइब। १२शुश आस पा यो मदुम्त हना, थुं लुक्च लाइब। तन्न आ मिम्शो गाप्त हना, ब्रोंइचा गेब रवा बाक्ब। १३अर्ती डा लोव्र मदाक्ब मुरुम आम कली श्येत चाक्ब। तन्न अरेशो टीबपुकीमी इनाम ताइनीम। १४जोक्ब तुइक्ब मुर आन शेंशो ब्रोंइचा गेब ब्वाक्कु बुक्तीके खोदेशो बाक्ब। मेको

रे पा मुर मबेकनीम। १५ रिम्शो मिम्ब मुर कली नेल्लेमी दाकनीम। तन्न खराप मुर आन लां हिंचा डा बाकब। १६ जोकब तुइकब मुरुमी निप्स खाप्शा नेल्ल गेय पाइब। तन्न मूर्खमी आंम मूर्ख दुम्तीके कोइब। १७ मरिम्शो लोत्र कुरबमी श्येत चाकब। तन्न थमा सुइकचा डा लोत्र कुरब मुरुम थुं नाइकचा डा लोत्र चाकब। १८ सुमी अर्ती मनेंबा, मेको प्रुडग नु सुइम मदाकशो मुर दुम्ब। तन्न हुइशो नेंब मुरुम मान ताइब। १९ मुर आंम दाकशो तामेनु, आन थुं कली रिम्शो दुम्ब। तन्न मूर्खमी आन मरिम्शो पतीके रे लेत्चा मदाकनीम। २० सु जोकब तुइकब नु गाकबा, मेको जोकब तुइकब दुम्ब। तन्न मूर्ख नु गाकब श्येत जाइब। २१ मरिम्शो पाइब आन कली श्येतम खोइकब। तन्न ठीक पाइब आ माल्शो मारेइ मारेइ जाकदीपब।
 हितोपदेस २८:८; अय्युब २७:१३-१७; उपदेसक २:२६
 २२ रिम्शो मुरुमी आ चच युइ आन कली शोंप हेंशा वोइकब। तन्न मरिम्शो पाइब आन शोंप ठीक पाइबपुकीम ताइनीम। २३ प्रुडग आन रूमी शुश अन्न खेल्ब। तन्न ठीक मपाइबमी मेको रोइशो लाइकब।
 हितोपदेस २२:१५
 २४ सुमी आ तौ कली शेंशा मतुप्बा, मेकोमी आ तौ कली मदाकब। तन्न सुमी आ तौ कली दाकबा, मेकोमी आ तौ कली शेंब। २५ ठीक पाइबमी रूत्री जचा ताइनीम। तन्न परमप्रभु यावे आ अरेशो मटीब शोत्रलुन बाकचा माल्नीम।

ठीक पतीकेमी रागी बारपाइकब।

१४ जोकब तुइकब मीश मुरुमी आंम खिं रिम्शो सेल्ब। तन्न मूर्ख मीश मुरुमी आ खिं कली आंम गुइमी प्रेपब। २ सु रिम्शो थुं पाइशो मुर

बाकमे, मेकोमी परमप्रभु यावे कली मान पा हिंब। तन्न सु हेंथे गाकबा, मेको मुरुमी परमप्रभु यावे कली मदाकब। ३ मूर्ख आन लोत्रमी आंम आन कली तेपब। तन्न जोकब तुइकब मुर आन लोत्रमी मेको आन कली कोत्रब। ४ ब्यफ मबाक्त हना, अन्न वोइक्तीके श्येतथ बाकब। तन्न बोल्यो ब्यफ पाइशो मुर के शुश अन्न बाकब। ५ थमा लोत्र पाइब सांकछीमी जोल मपाइब। तन्न जोल पाइब सांकछीमी जोल पना पन बाकब।
 प्रस्थान २०:१६; प्रस्थान २३:१
 ६ शुक्शी पाइबमी तुइक्तीके माल्ना माल्न बाक्त हना यो, मथिपब। रूपब मुर मोशा जोकब दुम्नीम। ७ मूर्खपुकी नु मगाकको। मारदे हना मेकोपुकी नु जोक्तीक लोत्र मबाकब। ८ निप्स पाइशो मुर आन तुइक्तीकेमी तेको लां गाकचा माल्नीमी तुइक्नीम। तन्न मूर्ख आन मूर्ख पतीकेमी हेंथे लां कोइब। ९ मूर्खमी पाप आ पर्वम चढेतीके कली शुक्शी पाइनीम। तन्न रिम्शो थुं पाइशो मुरुमी परमप्रभु आ दाकशो तशा ग्येरब। १० थुं डा श्येत थुंम ला तुइकब। मिनु थुं आ ग्येरसीशो थुंमी ला तुइकब। रोमी १२:१५
 ११ परमप्रभु यावे आ अरेशो मटीब आ खिं प्रेत्चा पुंडसीब। तन्न रिम्शो थुं पाइशो मुर आन ताम्बु सोशो बोशो दुम्शा लाइब।
 हितोपदेस १२:७
 १२ मुर आन कली आंम पशो लां ठीक तांइसीब हना यो, नोले मेको बेकपाइकब लां बाकब। १३ मुर आ कुल रिस्साक्व हना यो, आ थुं खाइशो बाक्ने चापब। ग्येरसीशो थुं नोले सुर्ता पाइब बाकब। १४ दूली पाइब आन दूली पशो डा ताइनीम। मिनु रिम्शो पाइबमी आन रिम्शो पशो डा ताइनीम। १५ मारेइ मजोक्ब मुरुमी मारेइ मारेइ लोत्र थमा

सुइक्वब। तन्न निप्स पाइश्शो मुरुमी आन पशो नेल्ल मिन्नीम। १६जोक्वपुकी होस पा मरिम्शो पतीकरे डोन लाइनीम। तन्न मूर्ख मारेइ ममिम्थु, होस मपाइब। १७रीब पा गाइक्वब मुरुमी मूर्खे गेय पाइब। मिनु मुर आन कली दोपा श्येत गेडा, दे मिम्ब। मेको सुइम मदाक्चा पुंडसीब। १८मारेइ मजोक्वब मूर्खे गेयम ग्योम्सीशो बाक्नीम। तन्न निप्स पाइश्शो मुर जोक्तीके सिरपेच गुप्शो खोदेशो बाक्नीम। १९मरिम्शो पाइब मुरपुकी रिम्शो मुर आन डोंडती बाप्नीम। मिनु परमप्रभु यावे आ अरेशो मटीबपुकी ठीक पाइब आन लाप्चोमी बाप्नीम। २०आंम नेक्था डा मुरुमी पुडग कली मदाक्नीम। तन्न शोप पाइश्शो मुर आन के वारच शुश बाक्नीम। २१सुम आ नेक्था डा मुर कली दिप्बा, मेकोमी पाप पाइब। तन्न सुमी पुडग आन कली वारच पाइबा, मेको ग्येरसीशो मुर बाक्ब। भजन संग्रह ४१:२ २२मार, मरिम्शो मिम्शा पाइब हेंथे लां मगाक्नीमी, डा? रिम्शो पचा मिम्शा पाइबमी गेना हना यो दाक्शा मप्रोंडचा पुंडसीनीम। २३गेय पतीक नेल्लेमी दारतीक बाक्ब। तन्न लोव्र पा ला बाक्ब मुर पुडग दुम्ब। २४जोक्वब मुर आन तुइक्तीके आन सिरपेच खोदेशो बाक्ब। तन्न मूर्ख आन पशो आन माला खोदेशो बाक्ब। २५थमा सांकछीमी मुर आन कली प्रोंडब। तन्न जोल पाइब सांकछीमी जोल ला पाइब। २६परमप्रभु यावे कली मान पा हिंचा, मेको मुर आ खुइश्शा ब्रोंडशा बाक्तीक बाक्ब। मेको आ आलपुकीमी यो मेको ताइनीम। हितोपदेश १८:१० २७परमप्रभु यावे कली मान पा हिंचा ब्वाक्कु बुक्तीक खोदेशो पा ब्रोंडतीक बाक्ब। मेको रे

पा मुरपुकी बेक्पाइक्वब आ ब्वारद रे ब्रोंडनीम। २८पिप आ दारस आ रागी डा शुश मुर बाक्नीम। तन्न मुर नुप्तेक्म हना, हुकुम पाइब जाम्शा लाइब। २९रीब पा मगाइक्वब शुश रुप्ब मुर बाक्ब। तन्न रीब पा गाइक्वब मुर मूर्ख दुम्शा लाइब। हितोपदेश १६:३२; हितोपदेश १६:११ ३०नांडसीशो थुमी मुर आन कली ब्रोंडचा गेब। तन्न गेहेमी मुर आन रुश मुपाइक्वब। ३१सुम पुडग आन कली दिप्बा, मेकोमी पुडग आन कली सेल्ब कली शुक्शी पाइब। तन्न सुमी पुडग आन कली शिशी पाइबा, मेकोमी परमप्रभु यावे कली मान पाइब। हितोपदेश १७:५; अय्युब ३१:१३-१५; मत्ती २५:४० ३२परमप्रभु यावे आ अरेशो मटीबपुकी मरिम्शो पतीकेमी जाम्शा लाइनीम। तन्न ठीक पाइब मुर आंम आन गेना हना यो रिम्शो पतीकेमी ब्रोंडशा बाक्चा ताइनीम। ३३रुप्ब मुर नु तुइक्तीक बाक्ब। तन्न मूर्ख आन थुमी तुइक्तीक मथिंसीब। ३४रागीम ठीक पाइब शुश बाक्तेक्म हना, मेकोपुकीम मेको रागी ठेयब नु रिम्शो सेल्नीम। तन्न मरिम्शो पाइब शुश बाक्तेक्म हना, मेको रागी कली महिक्सीशो सेल्नीम। ३५पिपमी जोक्शा गेय पाइब कली दाक्ब। तन्न मुने पचा डा गेय पाइबमी पिप आ गाइश्शो डा सजाइ ताइब। उत्पत्ती ४१:३७-४०

हाक्शो कुलम ग्येरपाइक्वब

१५ ब्रोंडशो पा लोव्र लेशोनु, गाइक्तीके तेक्ब। तन्न हुइश्शा पशो लोव्रमी मुर आन कली गाइक्पाइक्वब। हितोपदेश २५:१५; १राजा १२:१३-१६ २जोक्ब तुइक्वब मुरपुकीमी लोव्र पाम्तेक्म हना, नेंबपुकी जोक्ब दुम्चा दाक्नीम। तन्न

मूर्ख आन लोत्र शोर गाकशो बाकब।
 ३ परमप्रभु यावेमी नेल्ल ताइब। मेकोमी
 रिम्शो पाइब नु मरिम्शो पाइब नेल्ल आन
 कली ताइब। २इतिहास १६:६ ४ रिम्शो लोत्र
 मुर आन कली ब्रोंइचा गेब रवा खोदेशो
 बाकब। तन्न दूली लोत्रमी मुर आन थुं
 जिक्ब। ५ मूर्खमी आ आम आफ आस
 शेंशो लोत्र मपाइब। तन्न सुमी शेंशो नेंशा
 पाइबा, मेको होस पाइब बाकब। ६ ठीक
 पाइब मुर आन खिंमी शुश शोंप बाकब।
 तन्न परमप्रभु यावे आ अरेशो मटीबपुकी
 श्येत जाइनीम। ७ जोक्ब तुइक्ब मुर आन
 लोत्रमी जोक्तीक फ्राइब। मूर्ख आन
 लोत्र मोदेशो मबाकब। ८ परमप्रभु यावे
 आ अरेशो मटीब आन चढेशो तशा,
 परमप्रभु यावे ग्रांग्रा दीब। तन्न रिम्शो थुं
 पाइश्शो मुर आन पुंइशो नेंशा ग्येरसीब।
 हितोपदेस २१:२७; यसैया १:११,१५; हितोपदेस २८:६;
 लूका १८:६-१४ ९ परमप्रभु यावे आ अरेशो
 मटीब मुर आन लां परमप्रभु यावे कली
 ग्रांग्रा बाकब। तन्न सुमी ठीक पाइबा,
 मेको कली दाक्ब। १० नोले शोंइसीशो
 मुर हिंचा डा सजाइ ताइनीम। तन्न
 हुइश्शो काइ मदाक्ब मुर बेक्चा माल्ब।
 ११ दोदेशो पा परमप्रभु यावेमी बेक्शो मुर
 आन बाक्तीके नु जाम्शा लतीके तुइक्बा,
 मोदेशो पा मुर आन थुं कली यो तुइक्ब।
 अय्युब २६:६; भजन संग्रह १३६:८; प्रकाश ६:१,११;
 येरमीया १७:१० १२ मुरम शुक्शी पाइब आन
 कली “मोदेशो मपावो” दे अरेशो काइ
 मदाक्नीम। मेकोपुकी जोक्ब तुइक्ब
 मुर आन नेक्था मलाइनीम। १३ ग्येरशो
 थुं पाइश्शो मुर आ कुल हाक्सीशो
 तांइसीब। तन्न सुर्ता पाइब आन थुं
 लुकच लाइब। १४ रुप्ब थुं पाइश्शो मुरुमी
 जोक्तीके माल्ब। तन्न मूर्खमी मूर्ख

पचा ला दाक्नीम। १५ श्येत जाइब आन
 नाक्ती मरिम्शो बाक्नीम। तन्न ग्येरसीशो
 थुं पाइश्शो मुर आन नाक्ती नेल्ल चाड
 खोदेशो बाक्नीम। हितोपदेस १७:२२ १६ शुश
 शोंप नु मेको आ पबंम श्येत जचा
 क्येडा इक्का ला शोंप बाक्शा परमप्रभु
 यावे कली मान पा हिंचा रिम्शो बाक्ब।
 १७ काइ मदाक्शो मुर नु ब्रोंइशो श्ये खमे
 जचा क्येडा, दाक्मुशा चूले खमे जशो
 रिम्शो बाक्ब। १८ शुश गाइक्ब मुरुमी
 जिचा पोक्ब। तन्न रीब पा मगाइक्ब
 मुरुमी जितीके तेक्ब। १९ अल्सी आन
 लां चूम ब्रीशो बाक्ब। तन्न रिम्शो थुं
 पाइश्शो मुर आन लां थेल्लो बाक्ब।
 २० जोक्ब तुइक्ब थुं पाइश्शो तौमी आ
 आफ कली ग्येरपाइक्ब। तन्न मूर्ख तौमी
 चहिं आ ममा कली महिक्ब। हितोपदेस १०:१
 २१ निप्स मपाइश्शो मुर मूर्ख गेय पचा
 ग्येरसीनीम। तन्न रुप्ब मुर गेना हना यो
 आंम लांम गाक्नीम। २२ अर्ती मनंथु गेय
 पाइब आन गेय शोर गाकशो बाक्ब।
 तन्न अर्ती गेब शुश बाक्तेक्म हना, मेको
 आन गेय रिम्शो दुम्ब। हितोपदेस ११:१४
 २३ मुरम ठीक पा लोत्र लेन्ने चाप्टु हना,
 ग्येरपाइक्ब। माल्ची ना माल्शो लोत्र
 पचा, गिश रिम्शो बाक्ब। २४ जोक्ब
 तुइक्ब मुर ब्रोंइचा गेब ग्येतथ लां लाइब
 बाक्नीम। मोपा बेक्शो मुर आन बाक्तीक
 लतीक लुकच लां मलाइनीम। २५ परमप्रभु
 यावेमी ठेयब लेशो मुर आन खिं प्रेशा
 गेब। तन्न वोइश बेक्शो मीश मुर आन
 के रू डा सांद एर ओंथ दुम्चा मगेब।
 २६ परमप्रभु यावेमी मरिम्शो मुर आन
 मिम्शो लोत्र ग्रांग्रा दीब। तन्न रिम्शो मुर
 आन लोत्र तशा ग्येरसीब। २७ शिंममी आंम
 खिं डा मुर आन कली श्येत गेनीम। तन्न

घूस मजाइबपुकी ब्रोंइनीम। भजन संग्रह १५:५
 २८ ठीक पाइब मुरपुकीमी लोव्र लेत्चा
 क्येडा डोंइती मिम्नीम। तन्न परमप्रभु
 यावे आ अरेशो मटीबपुकीम हेंथे लोव्र
 पाइनीम। २९ परमप्रभु यावे आ अरेशो
 मटीब आन क्येडा डोन बाक्ब। तन्न
 ठीक पाइब आन पुंइशो लोव्र नेंब।
 हितोपदेस १५:२६; यूहन्ना ६:३१ ३० ब्रशो कुलमी
 थुं कली ग्येरपाइक्ब। रिम्शो लोव्रमी रां
 कली बोल्यो सेल्ब। ३१ सुमी रिम्शो अर्ती
 नेंशा पाइबा, मेको जोक्ब तुइक्ब मुर आन
 दातेम बाक्ब। ३२ सुमी रिम्शो अर्ती नेंशा
 मपाइबा, मेकोमी आंम कली यो मदाक्ब।
 तन्न अर्ती नेंबमी आ रुप्तीके बारपाइक्ब।
 ३३ परमप्रभु यावे कली मान पा हिंतीके
 तुइक्तीक कली शेंसीतीक बाक्ब। मिनु
 मान तचा क्येडा डोंइती ब्रेम्शो थुं पाइश्शो
 दुम्चा माल्ब। हितोपदेस १८:१२; हितोपदेस २२:४

परमप्रभुम मुर आन कली लां कोंइब

१६ मुर आन थुंमी मिम्ना मिम्न
 बाक्नीम। तन्न लोव्र लेत्तीक
 परमप्रभु यावे रे जाक्ब। २ आंमा पशो गेय
 आंमा कली ठीक मिम्सीब। तन्न परमप्रभु
 यावेमी मुर आन थुं नाक्ब। ३ इन पशो
 नेल्ल परमप्रभु यावे कली जिम्मा गेन।
 मिनु इन मिम्शो जाक्दीप्ब। भजन संग्रह ३७:३
 ४ परमप्रभु यावेमी मारेइ मारेइ नेल्ल गेय
 पचा कली सेल्लु। आ अरेशो मटीब कली
 यो नोले डा श्येत नाक्त कली सेल्लु।
 रोमी ६:२२ ५ परमप्रभु यावे ठेयब लेशो
 आन कली तशा ग्रान्रा दीब। मेकोपुकी
 सजाइ मतथु मब्रोंइनीम। ६ दाक्शा गेनायो
 मप्रोंइतीकेमी मरिम्शो पतीक क्याम्सीब।
 मिनु सु परमप्रभु यावे कली मान पा
 हिंबा, मेको मरिम्शो रे डोन लाइब।

७ परमप्रभु यावेमी मुर आन पशो तशा
 ग्येरसाक्व हना, मेको कली आ जोरी सत्रु
 नु यो गारपाइश्शा वोइक्ब। उत्पत्ती ३१:२४;
 उत्पत्ती ३३:४ ८ मरिम्शो पा चेम्शो शुश क्येट
 क्येडा रिम्शो पा चेम्शो इच्का खोइ क्येट
 ठीक बाक्ब। हितोपदेस १५:१६ ९ मुरुमी आंम
 आ लां आंमान मिम्नीम। तन्न परमप्रभु
 यावेमी मेको आन गाक्तीक लां कोंइब।
 हितोपदेस १६:२१; येरमीया १०:२३ १० परमप्रभु
 यावेमी पिप कली ब्वाक्पाइक्ब। मेकोमी
 निसाफ पशोनु, दूली निसाफ मपाइब।
 ११ ठीक पा नाक्तीक नु पुक्तीक
 परमप्रभु यावे केन बाक्ब। भोलाम
 बाक्शो नाक्तीक फुल्लु नेल्ल आ सेल्शो
 बाक्नीम। हितोपदेस ११:१ १२ पिपमी मरिम्शो
 पाइब आन कली तशा ग्रान्रा दीब। मारदे
 हना ठीक पतीकेमी आ राज्य बोल्यो
 सेल्ब। १३ पिपमी ठीक लोव्र पाइब आन
 कली तशा ग्येरसीब। थमा लोव्र पाइब
 आन कली दाक्ब। १४ पिप गाइक्ताक्व
 हना, मुर साइक्ने चाप्ब। रुप्ब मुरुमी
 आ गाइक्चा नाइक्पाइक्ने चाप्ब।
 हितोपदेस १६:१२; हितोपदेस २०:२ १५ पिप आ
 कुल हाक्शो बाक्त हना, ब्रोंइचा गेब।
 मेको आ दाक्शो सोव्रशो रू कली रेड
 खोदेंशो बाक्ब। १६ क्येख सुन तचा क्येडा
 तुइक्तीक तचा रिम्शो बाक्ब। चांदी
 तचा क्येडा रुप्तीक तचा रिम्शो बाक्ब।
 १७ रिम्शो थुं पाइश्शो मुर मरिम्शो लां रे
 डोन बाक्ब। मिनु मरिम्शो मपथु, होस
 पा बाक्ब ब्रोंइचा ताइनीम। १८ मुर खतम
 दुम्चा क्येडा डोंइती ठेयब लेत्नीम। नुप्चा
 क्येडा डोंइती मुर बोरनीम। हितोपदेस १८:१२
 १९ ठेयब लेशो आन रोइश्शो थोव्रक
 योक्सीचा क्येडा ब्रेम्शो दुम्शा, श्येत जशो
 आइक्च मुरपुकी नु बाक्चा रिम्शो बाक्ब।

२० सुम शेंशो लोव्र नोफा दाइशशा नेंबा, मेको मुर सोशा बोशा ग्येत्थ लाइब। सु परमप्रभु यावे कली थमा सुइक्बा, मेको ग्येरसीशो बाक्ब। २१ जोक्ब तुइक्ब थुं पाइशशो मुर कली रुप्ब मुर देंनीम। ब्रोव्रशो लोव्रम शेंतीक कली बारपाइक्ब। २२ सु नु तुइक्तीके बाक्बा, मेको ब्रोइचा गेब ब्वाक्कु बुक्तीके खोदेशो बाक्ब। तन्न मूर्ख आन मूर्ख पतीकेमी सजाइ ताइनीम। २३ जोक्ब तुइक्ब मुरुमी लोव्र पचा क्येडा डोंइती मिम्नीम। मोपा आन जोक्तीक बारना बारन लाइब। २४ ब्रोव्रशो लोव्र खुदो खोदेशो बाक्ब। मेकोमी थुं कली ब्रोव्रशो नु रां कली बोल्यो सेल्ब। हितोपदेस १२:२५ २५ मुरुमी का निक्शी लां रिम्शो बाक्ब, दे मिम्नीम। तन्न नोले मेको लां बेक्तीक लां बाक्ब। २६ गेय पाइब आन कोव्रजमी मेको कली गेय पपाइक्ब। मेको आ शोव्रलुमी गेय पतीक थुं गेब। २७ हिंचा डा पा मरिम्शो पाइब मुरुमी मरिम्शो ला मिम्ब। मेको आ लोव्र मी खोदेशो पा ब्रशो बाक्ब। २८ दूली मुरुमी जिचा पोक्ब। मिनु नोफा मुइक्बमी गारशो वारच आन कली फ्राब। २९ हुश ख्राक्श पोक्ब मुरुमी आ नेक्था डा मुर आन कली यो हेंथे पपाइक्ब। मिनु मेको आन कली मरिम्शो लां खोइक्पाइक्ब। ३० मिक्च रिक्बमी दूली गेय पचा मिम्शो बाक्बमी। मोदेशो मिम्शा सिक्सी पा बाक्बमी मरिम्शो पचा चिक्शो बाक्ब। ३१ बोइशशो चां मान ततीक सिरपेच खोदेशो बाक्ब। मेको ठीक पाइब मुर आन लांम ला थीसीब। हितोपदेस २०:२६ ३२ लडाइ पाइब बोल्यो मुर दुम्चा क्येडा फाल्ब मुर दुम्चा रिम्शो बाक्ब। मिनु सहर कली ग्राब क्येडा आंम गाइक्चा

कली तेक्ब रिम्शो बाक्ब। हितोपदेस १४:२६ ३३ मुरुम फेन्टे आप्शा, परमप्रभु यावे कली हिल्लो पाइनीम। मिनु परमप्रभु यावेमी लोव्र लेप्ब।

ग्येरशो थुं

१७

जिना जिन ब्रोव्रशो जचा क्येडा सिक्सी पा थुं नाइशशा पोक्तो खमे जचा रिम्शो बाक्ब। हितोपदेस १४:१७ २ जोक्ब तुइक्ब वाइलमी आ होव्रप आ मरिम्शो पाइब तौ कली अरेब। मिनु मेको वाइलमी खिं डा तौ खोदेशो पा रू ताइब। ३ सुन चांदी यपाइशशा नाक्चा कली ग्योब नु मी माल्ब। तन्न परमप्रभु यावेमी मुर आन थुं नाक्ब भजन संग्रह ६६:१० ४ मरिम्शो पाइब मुरुमी परमप्रभु यावे आ अरेशो मटीब आ लोव्र नेंब। जोल पाइबमी खतम सेल्लतीक लोव्र नेंचा कली नोफा दाइक्ब। ५ सुम प्रुडग आन कली शुक्शी पाइबा, मेकोमी आ कली सेल्ब, परमप्रभु यावे कली आइक्च सेल्ब। सु मुर आन कली श्येत जशो तशा ग्येरसीबा, मेको सजाइ मतथु मब्रोइब। हितोपदेस १४:३१ ६ खाल्पा खाल्पी आन सिरपेच आन चच युइ नमी। मिनु आल आन ग्योम्सीशो आन आम आफ बाक्नीम। ७ मूर्खपुकीमी रिम्शो लोव्र पचा मशिरनीम। मेको क्येडा ठेयब मुरपुकीमी जोल पचा मशिरब। ८ घूस गेबमी आ घूसमी मारेइ मारेइ पने चाप्ब, दे मिम्ब। मेको ते लत हना यो आ देशो खाप्ब। ९ सुमी अरु आन मरिम्शो पशो सुम्बा, मेकोम वारच सेल्ब। तन्न मुर आन मरिम्शो पशो देंना देंन बाक्बमी वारच आन कली फ्राब। १० मूर्ख मुर कली सहे खेयप तुप्चा क्येडा जोक्ब तुइक्ब मुर खेयप का देशोनु रुप्ब।

११ मरिम्शो मुरपुकीमी गेना हना यो जिचा पोक्नीम। तन्न मेको कली सजाइ गेचा कली शिशी मपाइब मुर सोइश्शो बाक्ब। १२ मूर्ख मुरुमी मूर्ख पवा ना गुम्चा क्येडा आ चाइक्ब रोंइसीशो वां कली गुम्चा रिम्शो बाक्ब। १३ सुमी रिम्शो पाइब आन कली मरिम्शो पाइबा, मेको आ खिं रे मरिम्शो गेनायो मलाइब। १४ दोपा प्रोंइशो ब्वाक्कु बोल पा शाइक्बा, मोपा जिचा पोक्तीक बाक्ब। मोपतीके जिचा ठेयब दुम्चा क्येडा डोंइती मेको कली तेक्कीन। १५ सुमी परमप्रभु यावे आ अरेशो मटीब आ पर्बम “ठीक पाइब बाक्ब” देंबा, मिनु ठीक पाइब आ पर्बम “ठीक पाइब मबाक्ब” देंबा, मेको निम्फा आस कली परमप्रभु यावेमी ग्रांग्रा दीब। *यसैया ५:२३* १६ मूर्ख आ गुडमी तुइक्तीक थुं ग्याप्चा कली क्येट मारदे माल्बा डा?। मेको के शेंसीतीक थुं मबाक्ब। १७ वारचमी गेना हना यो दाक्ब। लोकबपुकी चहिं श्येत जशो ना वारच पचा कली जरमेशो बाक्नीम। १८ सु आ नेक्था डा मुर आ पर्बम जमानी बाक्चा कली सल्ला पाइबा, मेको मरुप्ब मुर बाक्ब। *हितोपदेस ६:१-५* १९ जिचा दाक्बमी पाप कली यो दाक्ब। लाइश्शो लाप्चो सेल्बमी मुर आन रुश जिकपाइक्ब। २० मरिम्शो थुं पाइश्शो मुर आन कली मारेइम मगाप्ब। दूली पा जोल पाइब मुर हिंचा डा श्येत जाइब। २१ मूर्ख तौमी आ आम आफ आस कली सुर्ता पपाइक्ब। मूर्ख आ आफ गेनायो ग्येरचा मताइब। २२ ग्येरसीशो थुंमी रां कली सापाइक्ब। तन्न लुक्च लशो थुंमी मुर कली सोत्रपाइक्ब। *हितोपदेस १५:१३-१५* २३ परमप्रभु यावे आ अरेशो मटीब मुरुमी निसाफ दूली सेल्चा कली खुइश्शा घूस

जाइब। *प्रस्थान २३:८* २४ रुप्ब मुरुम आ तुइक्तीके माल्ब। तन्न मूर्खमी रागी आ सुर सम्म कोव्रशो बाक्ब। *हितोपदेस ४:१५* २५ मूर्ख तौमी आ आफ कली सुर्ता पपाइक्ब। आ आम कली गेना हना यो डाक्पाइक्ब। २६ दोस मताइब मुर कली सजाइ गेचा क्येडा ठेयब मुर आन कली रिम्शो पचा कली तुप्चा मरिम्शो बाक्ब। २७ जोक्ब थुं पाइश्शो मुर शुश मब्वाक्नीम। रुप्ब मुर आन गेय पचा डोंइती मिम्शा, बाक्नीम। *हितोपदेस १०:१६; याकूब १:१६* २८ मूर्ख ब्वालेइ पा बाक्त हना, मूर्ख मुर यो रुप्ब मुर खोदेशो तांइसीब। लोव्र मपाम्तेक्म हना निप्स पाइश्शो खोदेशो तांइसीनीम। *अय्युब १३:५*

लोव्रमी बेक्तीक नु ब्रोंइतीक बाक्ब

१८ सु मुर रे ब्राशा बाक्बा, मेकोमी आंम कली ला रिम्शो पचा दाक्ब। मेकोमी रुप्तीक थुं पाइश्शो मुर आन लोव्र काइ मनेंब। २ मूर्खमी मारेइ लोव्र रुप्चा थुं मपाइब। तन्न “गो जोक्नुड” दे आ मिम्शो लोव्र ला पाइब। ३ परमप्रभु यावे आ अरेशो मटितीक नु महिक्मुतीके यो जाक्ब। मिनु मुने दोक्तीक नु मान मततीके यो जाक्ब। ४ मुर आन लोव्र शुश लुक्च लशो ब्वाक्कु खोदेशो बाक्ब। तुइक्तीके शुश ब्वाक्कु बुक्शा गूशो खोदेशो बाक्ब। ५ दोस ताइब आ कुल कोव्रशा, दोस मताइब कली दूली सेल्चा, ठीक निसाफ ममाइ। *ब्यवस्था १:१७* ६ मूर्ख आ लोव्रमी जिचा पोक्ब। मिनु मेको तुप्चा पुंइसीब। ७ मूर्ख आ लोव्र पतीकेमी आंमान खतम दुम्ब। आ लोव्रमी मेको कली साइक्ब। ८ नोफा मुइक्ब आन लोव्र शुश ब्रोंइशो जचा थोव्रक खोदेशो

बाक्ब। मेको मुर आन थुं सम्म जाक्दीप्ब।
 हितोपदेस २६:२२ ९अल्सी पाइब मुर हेंथे
 पाइब आ लोकब बाक्ब। हितोपदेस १०:४
 १० परमप्रभु यावे आ नें बोल्यो लाइशशो
 खिं खोदेशो बाक्ब। ठीक पाइबपुकी
 मेकेर दोरशा लशा, ब्रोंइशा बाक्नीम।
 हितोपदेस १४:२६; भजन संग्रह ६१:४ ११ थीब
 मुर आन शोंप मेको आन कली बोल्यो
 सहर खोदेशो बाक्ब। मेकोपुकीमी
 आन शोंप कली ठेयब गारो खोदेशो
 मिम्नीम। हितोपदेस १०:१५ १२ खतम दुम्चा
 क्येडा डोंइती मुर ठेयब लेत्नीम। मान
 तचा क्येडा डोंइती मुर ब्रेम्शो दुम्नीम।
 हितोपदेस १६:१८ १३ सुमी लोव्र नेंचा क्येडा
 डोंइती लोव्र लेप्बा, मेको मूर्ख दुम्तीके
 मुने दोक्ब मुर बाक्ब। १४ मुर आ थुंमी
 रां डा रोइ फाल्ने चाप्ब। तन्न आ थुं
 लुकच लत हना, सुम फाल्ने चाप्बा डा?
 १५ निप्स पाइशशो मुर आ जोक्तीके
 बारना बारन लाइब। जोक्ब तुइक्ब मुरुमी
 मेको क्येडा जोक्चा कली नोफा दाइक्ब।
 १६ सुमी कोसेली गेबा, मेकोमी ठेयब
 मुर नु लोव्र पचा यो ताइब। उत्पत्ती ४३:११
 १७ सुमी जितीकेमी डोंइती ब्वाक्बा, मेको
 कली नोले डा मुर मब्बाक्म सम्म नेल्लेमी
 ठीक मिम्शा थमा सुइक्नीम। १८ फेन्टे
 आप्शोनु, जिचा खेचा देक्ब। मिनु ठेयब
 मुर आन जिचा नाइक्पाइक्ब। १९ थुं
 खाइक्पाइशशो लोकब कली लेम्चा गारो
 हिरशो सहर ग्राचा क्येडा श्येत बाक्ब।
 मुर आन जितीक खेतीके बोल्यो खिं
 डा आग्लो खोदेशो बाक्ब। २० मुर आन
 लोव्रमी ब्रोंइनीम। मेको आन रिम्शो लोव्र
 पशोमी जचा ताइनीम। हितोपदेस १२:१४
 २१ मुर आन लोव्रमी बेक्तीक नु ब्रोंइतीक
 बाक्ब। तेको कली दाक्नीनी, मेको

आ ततीक ताइनीनी। २२ सुमी मीश
 ताइबा, मेको कली रिम्शो दुम्ब। मेको
 मुर परमप्रभु यावे आ दाक्शो मुर दुम्ब।
 हितोपदेस १९:१४; हितोपदेस ३१:१० २३ पुडग
 मुरुमी ब्रेम्शो लोव्र पा पुंडनीम। तन्न शुश
 शोंप पाइशशो मुरुमी ठेयब लेशशो लोव्र
 लेत्नीम। २४ का निक्शी मुरुमी “वारच
 नड” देखु पाइनीम। तन्न आंम लोकब
 क्येडा थमा पा दाक्ब वारच गेना हना यो
 आ वारच नु काथा बाक्ब। हितोपदेस १७:१७

पुडग आन कली वारच पावो

१९ दूली लोव्र पा गाक्ब मूर्ख
 दुम्चा क्येडा पुडग नु गेना
 हना यो रिम्शो पाइब मुर दुम्चा रिम्शो
 बाक्ब। हितोपदेस २८:६ २गे मार मार
 माल्नीनी मेको आ पर्वम मतुइक्ताक्नी
 हना, मेको शोर गाक्शो बाक्ब। सु रीब पा
 गाक्बा, मेको आ लां जाम्ब। ३ मुर आन
 मूर्ख पतीकेमी खतम दुम्नीम। मो हना यो
 मेकोपुकीमी परमप्रभु यावे कली दोस
 गेनीम। बिलाप ३:३९ ४ शुश क्येट बाक्ब मुर
 नु शुश वारच बाक्नीम। तन्न पुडग आन
 कली आन बाक्शो वारचमी यो प्रोंइनीम।
 हितोपदेस १४:२० ५ जोल पा सांकछी
 बाक्ब मुर सजाइ मतथु मब्रोंइब। मिनु
 जोल पाइब यु बुइशशा प्रोक्ने मचाप्ब।
 हितोपदेस २१:२८; ब्यक्स्था १९:१८-२१ ६ शुश
 मुरुमी ठेयब मुर आन शिशी दाक्नीम।
 मिनु सुमी अरु कली गेबा, मेको आ
 वारच शुश बाक्नीम। ७ पुडग मुर कली
 आ लोकबपुकीमी यो पांइनीम। मेको
 आन क्येडा आ वारचपुकीमी प्रोंइनीम।
 मेकोमी मेको आन कली ब्रेप्ब, तन्न
 सुइम मननेनीम। ८ सुम आंम कली दाक्बा
 मेकोमी तुइक्तीक माल्ब। रुप्व मुर सोशा

बोशा ग्येत्थ लाइब। ९जोल पा सांकछी बाक्ब मुर सजाइ मतथु मब्रोंइब। मिनु जोल पाइब मुर खतम दुम्नीम १०मूर्ख मुर क्येट थीब मुर खोदेशो पा बाक्चा मशिरब। मिनु वाइलमी ठेयब मुर आन कली हुकुम पचा यो मशिरब। ११निप्स पाइश्शो मुर ओंखां पा गाइक्नीम। मिनु अरुमी थुं खाइक्तीक लोत्र पाम्तेक्म हना यो, मेको सिक्सी पा बाक्चा आ मान बाक्ब। हितोपदेस १४:२६ १२पिप आ गाइश्शो गुप्स आ ग्रीशो खोदेशो बाक्ब। आ दाक्तीक चहिं घांस तार दोक्शो सुनी डा सीत खोदेशो बाक्ब। हितोपदेस १६:१४-१५ १३निप्स मपाइश्शो तौ आ आफ कली श्येत बाक्ब। मिनु गेना हना यो जिचा पोक्ब मीश, तप तप पा याप्शो ब्वाक्कु खोदेशो बाक्ब। हितोपदेस २७:१५-१६ १४खिं नु शोंप आम आफ रे तांडसीब। तन्न होस पाइब मीश चहिं परमप्रभु यावे रे तांडसीब। हितोपदेस १८:२२ १५अल्सी पतीकेमी निन्द्रा पपाइक्ब। अल्से शोत्रलुन बाक्चा माल्नीम। १६सुमी परमप्रभु यावे आ शेंशो टीनीमी, मेको ब्रोंइचा ताइनीम। सुमी मटीनीमी मेको बेक्चा माल्नीम। हितोपदेस १६:१७ १७सुमी पुडग कली शिशी पा गेबा, मेकोमी परमप्रभु यावे कली गेब। मिनु परमप्रभु यावेमी मेको कली नेल्ल लेप्ब। हितोपदेस १४:३१; भजन संग्रह ४१:२-४; दानीएल ४:२४; मत्ती ५:७; मत्ती २५:४०; २कोरिन्थी ६:६ १८आस बाक्म सम्म इ तौ कली शेंशा तुपो। तन्न मेको कली तुप्शा मसतो। ब्यवस्था २१:१८-२१ १९रीब पा शुश चुरब मुर सजाइ ताइब। गे मेको कली तेक्चा माल्तीवी हना, मेको क्येडा शुश गाइक्ब। २०नोफा दाइश्शा अर्ती नेंशा, शेंतीक टिने। मो पाइतीनी हना, तुइक्तीक

पाइश्शो मुर दुम्नीनी। २१मुर आ थुंमी शुश मिम्तीक बाक्नीम। तन्न परमप्रभु यावे आ मिम्शो ला दुम्ब। हितोपदेस १६:६ २२शिशी पाइब मुर दुम्चा रिम्शो बाक्ब। जोल पाइब दुम्चा क्येडा पुडग दुम्चा रिम्शो बाक्ब। २३परमप्रभु यावे कली मान पा हिंचा ब्रोंइतीक बाक्ब। मो दुम्त हना, गे महिंथु, श्येत मजथु बाक्नीनी। २४अल्सेपुकीमी आन गुइ खमेम खुम्नीम। तन्न आन गुइ शोत्र सम्म मचाक्नीम। हितोपदेस २६:१५ २५शुक्शी पाइब आन कली तुप्शोनु, मारेइ मजोक्बपुकी होस पा बाक्चा शेंसीनीम। निप्स पाइश्शो मुर कली हुइश्शोनु, मेको क्येडा जोक्ब दुम्ब। हितोपदेस २१:११ २६सुमी आ आफ कली श्येत गेबा नु आ आम कली खेरबा, मेको ग्रांग्रा दिशो नु मुने तोक्ब तौ बाक्ब। २७आं तौ, गे जोक्ब मुर आन लोत्र रे हेंथे लचा प्रोनो। मो पाप्तीवी हना गे शेंशो लोत्र नेंने चाप्नेवे। याकूब १:२२ २८शोर गाक्शो सांकछीमी निसाफ पतीक आ पर्वम शुक्शी पाइब। मेकोमी परमप्रभु यावे आ अरेशो मटीब। मरिम्शो पतीके जचा थोत्रक खोदेशो पा दाक्ब। २९सजाइ शुक्शी पाइब आन कली बाक्ब। तुप्तीके मूर्ख आन ची कली माल्ब। हितोपदेस २६:३

जोल पा नाक्तीक

२० अडगुर शांबुमी हेंथे ब्वाक्पाइक्ब। राकसीमी राम्शी पपाइक्ब। सु मेको तूशा दुक्नीमी, मेको जोक्ब तुइक्ब मदुम्नीम। हितोपदेस २३:२६-३५; हितोपदेस ३१:५; होसे ४:११ २पिप आन शुश गाइश्शो गुप्स आन ग्रीशो खोदेशो बाक्ब। सुम मेको कली गाइक्पाइक्बा, मेको साइक्चा पुंडसीब।

हितोपदेस १६:१४ ३राम्शी पतीकरे डोन बाकब मुरुमी मान ताइब। तन्न मूर्ख नेल्ल रीब पा राम्शी पाइब बाक्नीम। ४ग्यू दुम्तीके अल्सेमी ब्यफ मवाकब। मिनु अन्न रिक्ची ना मारेइ यो मताइब। हितोपदेस ६:६-११; ५मुर आन थुं डा मिम्शो लुकच लशो ब्वाक्कु खोदेशो बाकब। तन्न निप्स पाइश्शो मुरुमी ला मेको कीशा गुंडने चाप्ब। ६शुश मुरुमी “गो रिम्शो मुर नड” दे अरु आन कली तुइक्पाइक्नीम। तन्न थमा सुइक्चा डा मुर सु थिन्ने चाम्सीबा डा? ७ठीक पाइब मुर गेना हना यो रिम्शो पाइब बाकब। मेको आ आलपुकी ग्येरसीशो बाक्नीम। भजन संग्रह ११२:१२ ८निसाफ पाइब नित्तीकेम निश्शो पिपमी कोव्रशा, रिम्शो नु मरिम्शो नेल्ल तिल्लब। भजन संग्रह १०१:३ ९मिनु सुमी “गो आं थुं रिम्शो सेल्ला। आं पाप क्याम्ताक्ड” देने चाप्बा डा? हितोपदेस ३०:१२; अय्युब ४:१७; अय्युब ६:२-३ १०जोल पा नाक्तीक नु मगारशो पुक्तीक निम्फा परमप्रभु यावे कली ग्रांग्रा बाकब। ११मिनु आल यो आन पतीकेमी दोदेशो दुम्नीमी मेको कोंइनीम। ठीक पाइब नु रिम्शो थुं पाइश्शो आल बाकब, दे तुंडसीब। हितोपदेस २२:६ १२नेंचा कली नोफा नु कोव्रचा कली मिक्च मेको निम्फा परमप्रभु यावेमी सेल्लु। १३शुश मइप्पो, मारदे हना गे पुडग दुम्नेवे। सेंसीशा बाक्को। मिनु शुश जचा ताइनेवे। १४ग्याप्ब मुरुमी “एको मरिम्शो बाकब। मरिम्शो बाकब” दे इक्का आइक्ची लशा “गो सस्तो ग्याप्ता” दे आ नें बोरपाइक्ब। १५शुश सुन नु शुश क्येट लाइब हीरा बाक्नीम। तन्न मेको आन क्येडा जोक्तीक लोव्र पाइब मुर रिम्शो बाकब। १६अर्को रागी डा मुर आ पर्वम जमानी

दुम्शो मुर, आ वा रोइश्शा लतीन। मुर आ पर्वम जमानी बाक्शो आ मारेइ मारेइ नेल्ले लतीन। हितोपदेस ६:१-२; हितोपदेस २७:१३ १७खुइ पा जशो शोब्ले डोंइती शुश ब्रोव्रब। नोले मेको फुल्लु नाक्शो खोदेशो दुम्ब। हितोपदेस ६:१७ १८अर्ती नेंब मुर आ मिम्शो रिम्शो दुम्ब। जोक्ब तुइक्ब आन लोव्र नेंशा ला लडाइ पावो। हितोपदेस २४:६ १९लोव्र क्याल्ब मुरुमी खुइश्शा पशो लोव्र यो फ्राइब। मोपतीके शुश लोव्र पाइब मुर नु वारच मदुमो। २०सुम आ आम आफ आस कली सराप पाइबा, मेको आ बत्ती नेल्ल क्येडा छिडछिडमी काप्ब। हितोपदेस ३०:१७; प्रस्थान २१:१७ २१डोंइती रीब पा थेरशो रू नोले आसीक मराइब। २२गे मरिम्शो पाइब कली क्येक्क लेत्नुड मदेनो। परमप्रभु यावेमी पाइब, दे रिम्दो। मिनु इ कली वारच पाइब। हितोपदेस २४:२६; रोमी १२:१७ २३जोल पा नाक्तीक तशा परमप्रभु यावे ग्रांग्रा दीब। मिनु दूली नाक्तीक ठीक मबाक्नीम। २४परमप्रभु यावेमी मुर आन कली लां कोंइब। सुमी आंम लां रुप्ने चाप्बा डा? २५मुरुमी ममिम्थु “परमप्रभु यावे केन बाकब” देंशा, कसम जचा, थम हिंचा डा बाकब। मारदे हना नोले मिम्शा, मार दुम्बा डा? २६जोक्ब तुइक्ब पिपमी परमप्रभु यावे आ अरेशो मटीब आन कली तिल्लब। मिनु मेको आन कली साइक्ब। २७मुर आन थुं परमप्रभु यावे आ बत्ती बाकब। मिनु मेकोमी रां नेल्ल कली कोव्रब। १कोरिन्थी २:११ २८गेना हना यो दाक्शा गेनायो मप्रोंइतीकेमी पिप कली खाल पाइब। आ ठीक पतीकेमी आ सासन पतीके मजाम्ब। हितोपदेस १६:१२ २९ठिटा आन दारस आन बोल्यो रां

बाकब। मिनु खाल्पा आन दारस आन बोइश्शो चां बाकब। ३० तुप्शो गारमी लेंशा मरिम्शो मपपाइकब। मिनु तुप्शोमी यो मुर आन थुं कली रिम्शो पाइब सेलब।

परमप्रभु कली टीबम रिम्शो पाइब

२१ पिप आ थुं परमप्रभु यावे आ गुइमी खोला डा ब्वाककु खोदेंशो बाकब। दोथ गे लाइकचा दाक्ता, मोथ गे लाइकब। भजन संग्रह ३३:१५ २ मुरुमी आंम कली गेना हना यो “ठीक पाता” दे मिम्नीम। तन्न परमप्रभु यावेमी मुर आन थुं नाकब। ३ परमप्रभु यावे आ डोंडती मार मार चढेचा क्येडा ठीक पतीके नु रिम्शो निसाफ पतीके आ दाक्शा ब्रतीक बाकब। १ सामुएल १५:२२; होसे ६:६ ४ ठेयब लेशो नु बोरशो मुर दुम्चा, परमप्रभु यावे आ अरेशो मटीब आन छेडछेड बाकब। मेको पाप बाकब। ५ शुश गेय पाइब आन मिम्तीकेमी सोशा बोशा ग्येत्थ लां खोइकपाइकब। तन्न रीब पा ममिम्थु गेय पाइब मुर प्रुडग दुम्ब। ६ जोल पा शुश शोंप चेम्तीके फशेमी योल्शा जाम्शो कुन खोदेंशो बाकब। मोदेंशो पाइबपुकी साइकचा पुंडसीनीम। ७ परमप्रभु यावे आ अरेशो मटीब आन हुश खाक्श पोक्तीकेमी साइकचा पुंडसीनीम। मारदे हना मेकोपुकीमी मार ठीक बाकमे, मेको पचा मबिल्लीम। ८ दोस ताइब मुर आन लां हिरशो बाकब। दोस मताइब मुर आन पतीक चहिं ठीक बाकब। ९ गेना हना यो जिचा पोक्ब मीश नु ठेयब खिंम बाकचा क्येडा, तला डा कुना कामी बाकचा रिम्शो बाकब। १० परमप्रभु यावे आ अरेशो मटीबपुकीमी मरिम्शो ला पचा दाक्नीम। मेकोपुकीमी आन नेक्था डा मुर आन

कली यो शिशी मपाइनीम। ११ शुक्शी पाइब कली सजाइ गेशोनु, मारेइ मजोक्ब मुर इक्का जोक्ब तुइक्ब दुम्नीम। मिनु जोक्ब तुइक्ब मुर आन कली शेंशोनु, आन जोक्तीके बारब। हितोपदेस १६:२५ १२ ठीक पाइबमी परमप्रभु यावे आ अरेशो मटीब मुर आन खिंम कोव्रना कोव्रन बाकब। मिनु परमप्रभुमी आ अरेशो मटीब आन कली खतम पोक्ब। १३ सुमी प्रुडग आन पुंडशो मनेंबा, मेकोमी यो पुनानु, सुइमी यो मनेंनीम। १४ खुइश्शोमी मार मार गेशोनु, चुरब मुर यो मचुरनीम। मिनु वा आगामी खुइश्शा गेशोमी ठेयब गाइक्तीक तेक्ब। १ सामुएल २५:१८-३५ १५ निसाफ दुम्मेनु ठीक पाइब ग्येरसीनीम। तन्न मरिम्शो पाइबपुकी हिंनीम। १६ सुइ मुर रुप्तीक लां प्रोइतु हना, मेको बेक्शो मुर आन बाक्तीक लशा नाइकब। १७ सुम आंम दाक्शो पना पन बाक्बा, मेको प्रुडग दुम्ब। सुमी अडगुर शांबु नु तेल दाक्बा, मेको मुर यो प्रुडग दुम्ब। हितोपदेस २३:२१ १८ ठीक पाइब आन पा डा परमप्रभु यावे आ अरेशो मटीबपुकीम सजाइ ताइनीम। मिनु गेना हना यो रिम्शो पाइब आन पा डा थमा सुइकचा मपुंडसीब मुर सजाइ ताइनीम। १९ शुश जिचा पोक्ब नु चुरब मीश नु बाकचा क्येडा गोरशो रागीमी बाकचा रिम्शो दुम्ब। २० जोक्ब तुइक्ब मुर आन खिंम शुश क्येट लाइब शोंप नु तेल बाकब। तन्न मूर्खमी आ बाक्शो नेल्ल थुम्ब। २१ सु मुरुमी ठीक पतीके नु शिशी पतीके आ नोले खोइकबा, मेको ब्रोंइशा, सोशा बोशा दुम्शा मान ताइब दुम्ब। २२ जोक्ब तुइक्ब मुर कामी बोल्यो लडाइ पाइब आन सहर कली लडाइ तोपुतु। मिनु मेकोमी आन बोल्यो, थमा

सुइश्शो, ब्रोंइशा बाक्तीक सहर ग्रात।
२३ सुमी मिम्शा ठीक लोव्र पाइबा,
 मेकोमी आमं कली श्येत रे प्रोंइब।
हितोपदेस १३:३ **२४** ठेयब लेशशो, बोरशो मुर
 आ नें शुक्शी पाइब बाक्ब। मेकोमी ठेयब
 लेशशो नु बोरशो गेय ला पाइब। **२५** अल्से
 गेय मपतीके बेक्नीम। मारदे हना अल्से
 आन गुडम गेय पने मबिप्ब। *हितोपदेस १३:४*
२६ नाक्त रे अल्सेमी मारेइ मारेइ माल्ब।
 तन्न ठीक पाइबमी मखेक्थु, गेब।
२७ परमप्रभु यावे आ अरेशो मटीब आन
 चढेशो ग्रांग्रा दिशो बाक्ब। मेकोमी
 मरिम्शो मिम्शा चढेशो शुश ग्रांग्रा बाक्ब।
हितोपदेस १५:८ **२८** जोल पाइब सांकछी
 जाम्शा लाइनीम। तन्न रिम्शो पा नोफा
 दाइश्शा नेंब मुर थमा डा सांकछी
 बाक्ब। *हितोपदेस १६:५,६* **२९** परमप्रभु यावे
 आ अरेशो मटीब मुर बोल्यो मुर खोदेशो
 पा गाक्नीम। तन्न गेना हना यो रिम्शो थुं
 पाइश्शो मुर मिम्ना मिम्न गाक्नीम। **३०** मुर
 आन तुइक्तीक, रुपतीके अर्ती गेतीके
 परमप्रभु यावे आ डोंइती थम आइक्च
 बाक्ब। *भजन संग्रह ३३:१०-११* **३१** लडाइ पची
 नाक्त कली शारा ठीक पशो बाक्त। तन्न
 ग्रातीक परमप्रभु यावे आ गुइमी बाक्ब।
भजन संग्रह ३३:१७

श्येत गेबम श्येत जाइब

२२ शुश क्येट शोंप क्येडा मान
 पाइश्शो रिम्शो बाक्ब। सुन
 चांदी क्येडा दाक्चा पुंडसीचा रिम्शो
 बाक्ब। *उपदेसक ७:१* **२** क्येट थीब नु पुडग
 मुर के गारतीक का बाक्ब। मेको मार
 बाक्ब देंशा हना, परमप्रभु यावेमी मेको
 निम्फा आस कली सेल्लु। *हितोपदेस २६:१३*
३ निप्स पाइश्शो मुर श्येत जाक्चा

चिक्शो तशा, खुंडसीनीम। तन्न मारेइ
 मजोक्ब मुरुमी मारेइ मतुइक्थु श्येत
 जाइनीम। *हितोपदेस २७:१२* **४** ब्रेम्शो थुं
 पाइश्शो नु परमप्रभु यावे कली मान पा
 हिंब मुर आन इनाम शोंप, मान ततीक नु
 ब्रोंइतीक बाक्ब। *हितोपदेस १५:३३* **५** दूली
 पाइब आन लामं चू नु ग्याइल बाक्नीम।
 होस पाइबपुकी मेको आन क्येडा डोन
 बाक्नीम। **६** इ तौ कली गारचा डा पा
 रिम्शो शेंदो। मेकोमी खाल्पा दुम्चा
 सम्म मेको लामं मप्रोंइब। *हितोपदेस २०:११*
७ क्येट थीबमी पुडग कली अधिकार
 पाइब। जेर ताक्ब मुर जेर गेब आ वाइल
 बाक्ब। **८** मुरुमी ठीक मपतीके शोक्तेकम
 हना, ठेयब श्येत खुप्नीम। मिनु आ
 गाइक्तीके आ कोक्के जिकब। *अय्युब ४:८*
९ हाइश्शो मुरुमी आसीक ताइब। मारदे
 हना मेकोमी आ जचा थोव्रक पुडग नु
 योक्ब। *हितोपदेस १६:१७* **१०** शुक्शी पाइब
 कली खेरो। मिनु जिचा खेचा नुप्ब।
 जिचा नु तुम्मुचा तेक्सीब। *हितोपदेस २६:२०*
११ सु रिम्शो थुं नु ठीक लोव्र पचा
 दाक्नीमी, मेको पिप आ वारच दुम्नीम।
कलस्मी ४:६; भजन संग्रह १०१:६ **१२** परमप्रभु
 यावेमी तुइक्ब मुर आन कली कोव्रब।
 तन्न हेंथे पाइब आन थमा सुइक्चा
 मपुंडसीब लोव्र थुम्पाइक्ब। **१३** अल्सेमी
 “लाडगामी गुप्स का बाक्ब। गो लाडगा
 लती हना, आ कली साइक्ब” देंब।
हितोपदेस २६:१३ **१४** हेंथे गाक्ब मीश मुर
 आ लोव्र ठेयब खाल्टा खोदेशो बाक्ब।
 परमप्रभु यावे आ गाइश्शो ताइबपुकी
 मेको खाल्टाम बिक्नीम। *हितोपदेस ५:३*
१५ वोंइश आल आन थुंमी मरिम्शो पतीक
 यो बाक्ब। तन्न शेंशा इक्का तुप्शोनु, आ
 मरिम्शो पतीके प्रोंइब। *हितोपदेस १३:२४;*

हितोपदेस २३:१३-१४; हितोपदेस २६:१७ **१६** आंम कली शोंप पाइशशो सेल्चा कली पुडग आ थोत्रक लाइक्चा नु क्येट थीब कली कोसेली गेचा, मेको निम्फा पुडग दुम्तीक गेय बाक्ब।

जोक्ब तुइक्ब मुर आ लोव्र

१७ इ नोफा दाइशशा जोक्ब तुइक्ब दुम्शा, आं लोव्र नेनो। मिनु आं लोव्र इ थुंम वोतो! हितोपदेस २४:२३ **१८** मारदे हना मेको लोव्र इ थुंमी वोइक्तीवी हना, इ कली रिम्शो दुम्ब। मिनु गे मेको गेना हना यो शेने चाप्नेवे। **१९** गे परमप्रभु यावे कली थमा सुतो, दे मुलाक्ती गो इ कली एको लोव्र शेंताक्ड। **२०** गो इ कली ३० ओटा देंतीके, अर्ती नु जोक्तीक लोव्र मब्रेक्तु डा? **२१** मारदे ब्रेक्ताक्ड देंशा हना, इ कली मार ठीक बाक्बा नु मार थमा बाक्बा, दे कोइंचा कली ब्रेक्ताक्ड। मोपा गे इ कली सोइक्ब आन कली थमा लोव्र लेन्ने चाप्नेवे। **२२** पुडग आन के मारेइ मबाक्ब, दे मेको आन के मारेइ मरोइक्तो। मिनु श्येत जाइब कली ठीक निसाफ पावो। प्रस्थान २३:६ **२३** मारदे हना परमप्रभु यावेमी मेको आन कली वारच पाइब। मेकोमी मेको रोइक्ब आन ब्रोंइतीक रोइक्ब। **२४** गाइक्ब मुर नु वारच मदुमो। मिनु शुश चुरब नु मगाक्को। हितोपदेस १५:१८ **२५** मेको नु गाक्ते हना, मोदेंशोन दुम्शा, ग्याइक्चा पुंइसीनेवे। **२६** मुर आन जेर आ पर्बम कसम जशा जमानी मबाक्को। हितोपदेस ६:१ **२७** मारदे हना गे थाप्ने मचाप्तीवी हना, इ ब्राख्ये यो रोइक्चा पुंइसीनेवे। **२८** इ किकी पिपीमी वोइशशो सांद डा फुल्लु गेनायो मयाक्तो। हितोपदेस २३:१०; व्यवस्था २७:१७

२६ जोक्ब गेय पाइब आन कली तनी? मेकोपुकी पिप आन कली गेय पाइब दुम्नीम। मेकोपुकीमी आइक्च मुर आन कली गेय मपाइनीम।

आल आन कली रिम्शो पा शेंदीन

२३ सासन पाइब नु जथ बाक्डेनु, इ डोंइती मार बाक्मे, मेको रिम्शो पा कोव्रडो। **२** गे शुश जचा व्वचा दाक्ताक्वी हना, इ लाकचामी छूरी वोतो। **३** मेको आ ब्रोंव्रशो जचा थोत्रक तशा मवलो। मारदे हना मेकोम इ कली खल्लब सेल्ब। **४** क्येट थीब मुर खोदेंशो दुम्चा कली मिम्शा बोल मपावो। जोक्ब तुइक्ब दुम्शा मोदेंशो मिम्चा प्रोनो। हितोपदेस २८:२२ **५** मेको याम का तशा नोले, चिक्ब खोदेंशो पा बेरशा लाइब। मेको ककाकुली खोदेंशो पा सरीड गे बेरशा लाइब। **६** शिंम आ खिंमी भोज जथ मलावो। मेको आन ब्रोंव्रशो जचा थोत्रक तशा मवलो। **७** मारदे हना मेकोम इ लाकचामी चांम खोदेंशो पा कारब। मेकोमी इ कली जने तूडीने देंत हना यो, मेको आ थुं गे नु मबाक्ब। **८** इ इक्का जशो नेल्ल मेचा कुइब। मेको कली इ ठेयब सेल्शा देंशो लोव्र नेल्ल मोशीन लाइब। **९** मूर्ख आ डोंइती लोव्र मपावो। मारदे हना इ जोक्ब तुइक्ब लोव्र नेंशा, शुक्शी ला पाइब। **१०** गे साइ डोंइती वोइशशो सांद डा फुल्लु मयाक्तो। मिनु रोम रोइक्च आन रू मचाइक्तो। हितोपदेस २२:२८ **११** मारदे हना मेको आन कली श्येत रे प्रोंइब बोल्यो बाक्ब। मेकोमी मेको आन पर्बम इ कली श्येत गेब। **१२** रिम्शो शेंतीक नेनो। जोक्तीक लोव्र नेंचा कली इ नोफा दाइक्तो। **१३** इ आल आन कली

रिम्शो पा शेंचा मप्रोनो। मेको आन कली सजाइ गेशा तुप्तीवी हना, मेको मबेक्नीम।
 हितोपदेस २२:१५ १४गे मेको कली इच्का तुप्तीवी हना, मेको आन कली बेक्शो मुर आन बाक्तीक लतीक लां रे प्रोइनेवे।
 १५आं तौ, गे जोक्ब तुइक्ब दुम्ते हना, आं थुं यो ग्येरसीब। १६गे ठीक लोत्र पवीनु, गो आं थुं रेन साप्पा ग्येरसीनुड। १७पापी आन कली गेहे मपावो। तन्न नाक्त किंत किंत परमप्रभु यावे कली मान पा हिनो।
 १८मो पाप्तीवी हना, इ ब्रोंइतीक नु इ मिम्शो नेल्ल जाक्दीप्व। १९आं तौ, आं लोत्र नेनो। जोक्ब तुइक्ब दुमो। मिनु इ थुं कली ठीक लांमी ग्येतथ गाकपतो।
 २०शांबू तूब नु शुश श्ये व्वाइबपुकी नु मबाक्को। २१मारदे हना दुक्ब नु शुश जाइब व्वाइब मुरपुकी प्रुडग दुम्नीम। शुश दुक्शा बाक्तीकेमी जेक्शो वा फेक्पाइक्ब।
 हितोपदेस २१:१७ २२इ आफ आ लोत्र नेनो। इ आम खाल्पी दुम्नेनु, मेको कली आइक्च मसेलो। हितोपदेस १:८ २३थमा पतीक कली ग्यापो। मेको कली गेनायो मलेयडो। तुइक्तीक, शेंतीक नु रुप्तीक ग्यापो। २४ठीक पाइब तौ तशा, आ आफ ग्येरसीब। जोक्ब तुइक्ब थुं पाइशो तौ तशा आ आफ शुश ग्येरसीब। हितोपदेस १०:१
 २५इ आम आफ ग्येरसीसल। इ कली थीब गेना हना यो ग्येरशा बाक्ल।
 २६आं तौ, इ थुं आं कली गेयी। आं पशो कोव्रडो। २७तेल्लेम मीश मुर ठेयब खाल्टा खोदेशो बाक्ब। ग्युंवे पा यो हेंथे पाइब मीश मुर लुक्च लशो इनार खोदेशो बाक्ब। हितोपदेस २२:१४; हितोपदेस ७:१०-१४
 २८मेको खुइ खोदेशो पा लांमी बाप्शा बाक्ब। मिनु हेंथे गाक्ब वोंइश मुर शुश सेल्ब।

२९सु श्येत जाइबा? सु सुर्ता पाइबा? सुम राम्शी पोक्बा? सुम गाली पाइबा? सु बित्चीम गार दुम्बा? सु का आ मिक्च लल जिशो बाक्बा? हितोपदेस २०:१; यसैया ५६:१२ ३०मेको नाक्दो सम्म शुश अडगुर शांबु तूब बाक्नीम। व्वाइशो अडगुर शांबु तूब बाक्नीम। ३१गे लल अडगुर शांबु कोव्रस डा कोव्रस मबाक्को। गिश दारशो बाक्मे, दे मकोव्रडो। मेको रिम्शो पा कोव्रजम लाइब। ३२मिनु मेकोमी नोले बुस्सुमी खोदेशो पा कोक्ब। मेको बीस पाइशो कोक्ब बुस्स खोदेशो बाक्ब। ३३मिनु इ मिक्चीमी मार मार ताइनेवे। मिनु दूली लोत्र पाइनेवे। ३४मिनु गे समुन्द्र आ दातेमी इप्शो खोदेशो दुम्नेवे। पला आ डल तारी इप्शो खोदेशो दुम्नेवे। ३५मिनु गे मार देंनेवे, देशा हना “आं कली तुप्तीमी, तन्न मखाइक्ड। तुप्तीमी तन्न मतुइक्तु। मुल गेना सेंसीशा, लेशा तूनुडा?” देंनेवे।

रुप्व मुर बोल्यो बाक्नीम

२४ मरिम्शो पाइब मुर आन मार मार तशा, गेहे मपने। मिनु मेको नु मबाक्कीन। २मारदे हना मेको आन थुंमी हुश ख्राक्श पोक्चा ला मिन्मीम। मिनु मेकोपुकीमी मरिम्शो आ पर्बम ला लोत्र पाइनीम।
 ३तुइक्तीकेमी खिं सेल्सीब। रुप्व मुरुमी आ खिं सेल्शा रिम्शो पा बाक्ब। ४जोक्तीकेमी मेको खिं डा कोठापुकी शुश क्येट लाइब नु रिम्शो थोव्रकीमी प्रिंब। हितोपदेस ३१:१०-३१ ५बोल्यो लडाइ पाइब आन क्येडा जोक्ब तुइक्ब लडाइ पाइब रिम्शो बाक्नीम। मिनु बोल पाइशो मुर आन क्येडा जोक्ब तुइक्ब मुरुमी

अधिकार ताइब। ६मारदे हना रिम्शो लां कोंइब बाक्त हना, लडाइ पने चाप्नीनी। अर्ती गेब शुश बाक्तेकम हना, लडाइ ग्रानीनी। हितोपदेस २०:२८; हितोपदेस ११:१४ ७मूर्खपुकीमी तुइक्तीके रुप्ने मचाप्नीम। मेकोपुकीमी ठेयब लाप्चो डा ग्रुम्तीकेमी लोत्र पने मचाप्नीम।

८सुमी काइ मरिम्शो पचा मिम्बा, मेको कली मरिम्शो पाइब देंनीम। ९मूर्खे गेय पाप बाक्ब। मिनु शुक्शी पाइब कली तशा मुर नेल्ल ग्रान्ग्रा दीनीम। १०श्येत नाक्ती गोल्या चिक्ताक्वी हना, इ बोल दोशो बाक्म डा? ११मुर कली साइक्चा, दे कीशा लाइशो ताप्तीवी हना, मेको आन कली प्रोंइथ लावो। मिनु साइक्चा पुंडसीचा चिक्शो कली वारच पावो। भजन संग्रह ८२:४ १२मिनु गे “गो मेको मतुइक्त्तु” देंते हना, थुं नाक्बम इ मरिम्शो पशो तुइक्ब। इ कली कोत्रबमी नेल्ल तुइक्ब। मेकोमी मुर आ मरिम्शो पशो डा क्येक्क लेप्ब। १३आं तौ, खुदो जावो। मारदे हना मेको रिम्शो बाक्ब। चाका रे याप्शो खुदो जीजी पा ब्रोत्रब। १४मार मिम्चा माल्नेवे देंशा हना, जोक्तीक तुइक्तीक इ थुं कली खुदो खोदेंशो जिज बाक्ब। मेको ताप्तीवी हना, इ कली नोले सम्म रिम्शो दुम्ब। इ मिम्शो जाक्दीप्ब।

१५गे परमप्रभु यावे आ अरेशो मटीब ठीक पाइब आन खिं खतम पोक्चा कली बाप्शा मबाक्को। मेको ठीक पाइब आ बाक्तीकेमी हुश ख्राक्श मपोक्को। १६ठीक पाइब मुरपुकी ७ खेयप गोल्लेक्म हना यो, लेंशा बोक्नीम। तन्न परमप्रभु यावे आ अरेशो मटीबपुकी मबोक्चा डा पा गोल्लीम। भजन संग्रह ३७:२४ १७इ जोरी सत्रु जाम्शा लाम्तेक्म हना,

मग्येरसो। मेकोपुकी दाइल पा थिस्साक्म हना, मरिस्सो। अय्युब ३१:२६ १८गे मेको तशा ग्येरसाक्वे हना, परमप्रभु यावेमी इ पशो मदाक्ब। मिनु इ जोरी सत्रु आन पर्बम गाइशशो नाइशशा मेको आन कली वारच पाइब।

१९काइ मरिम्शो पाइब आन पर्बम मगाइक्तो। परमप्रभु यावे आ अरेशो मटीब आन पर्बम गेहे मपावो। भजन संग्रह ३७:१ २०मारदे हना काइ मरिम्शो पाइब शुश नाक्त मलीनीम। मिनु परमप्रभु यावे आ अरेशो मटीब आन बत्ती काप्शा लाइब। हितोपदेस १३:६ २१आं तौ, परमप्रभु यावे नु पिप कली मान पा हिनो। मेको आस कली मटीब नु मगाक्को। १पत्रुस २:१७ २२मारदे हना मेको आस पतीके रे गे मतुइक्थु श्येत जने चाप्नेवे। मिनु मेको आस खतम पोक्तीक सुम तुइक्बा?

अरु अर्ती

२३एको लोत्र जोक्ब तुइक्ब मुर आन देंशो बाक्ब। निसाफ पतीकेमी कुल कोत्रमुचा मरिम्शो बाक्ब। लेवी १६:१५ २४सुमी पाप पाइब कली “गे ठीक पाइब बाक्नीनी” देंबा, जात जात डा मुरपुकीमी मेको कली सराप पाइनीम। रागी रागी डा मुरपुकी मेको आ पर्बम ग्रान्ग्रा दीनीम। २५तन्न सुमी मरिम्शो पाइब कली अरेबा, मेको ग्येरसीनीम। मिनु मेको शुश आसीक ताइनीम। २६थमा लोत्र लेत्चा, मुर कली पुक्पु पशो खोदेंशो बाक्ब। हितोपदेस १५:२३ २७डोंइती इ लाडगा डा गेय थुमो। इ रूमी मार मार शोक्को। मिनु नोले इ खिं सेलो। २८गे इ नेक्था डा मुरुम मारेइ मपथु, मेको आ पर्बम सांकछी मबाक्को। गे जोल मपावो। प्रस्थान २०:१६ २६गे “मेकोम आं

कली मार पवा, मेको कली यो मोदेशोन पाइनुड। गो मेको कली क्येक्क लेत्नुड” मदेनो। *हितोपदेस २०:२२* ३० गो अल्लसे मुर का आ रू रे पा लती। निप्स मपाइश्शो मुर आ अडगुर रू रे पा कोव्रना कोव्रन लती। ३१ मिनु गो मार ताता देशा हना, मेको रू नेल्ल चूम सुम्शो बाक्त। खप नेल्ल चूले वाशो बाक्तेक्म। मिनु रू एर ओंथ डा गारो यो ब्रेश्शो बाक्त। ३२ मिनु गो नेल्ल कोव्रशा, मिम्ताक्ड। मिनु शेंतीक लोव्र का रुप्ता। मार रुप्ता देशा हना, ३३ याम का डा इच्चा। याम का डा निन्द्रा पचा। याम का गुड फिल्मा पा बाक्चामी *हितोपदेस ६:६-११* ३४ प्रुडग दुम्तीके नु श्येत जतीके या कुरब मुर खोदेशो पा रीब पा मेको मुर तारी जाक्ब, दे रुप्ता।

सोलोमन आ अरु ब्रेक्शो लोव्र

२५ एको सोलोमन आ अरु देंतीक लोव्र बाक्नीम। मिनु यहूदा डा पिप हिज्कीयाह आ मुरपुकीमी मेको ब्रेक्शो बाक्तेक्म। *हितोपदेस १:१; हितोपदेस १०:१* २ परमप्रभुमी का निक्शी लोव्र खुडइश्शा आ सक्ति कोइब। तन्न पिपमी नेल्ल तुइक्पाइश्शा, आ सक्ति ठेयब सेल्ब। ३ सरीड गिश ग्येत्थ बाक्बा, रागी गिश लुक्च लाइबा नु पिप आ थुंमी मार मिम्बा, मेको सुइमी यो तुइक्ने मचाप्नीम। ४ चांदी यपाइश्शा, आ कस ग्रुंडताक्म हना, चेम्बमी रिम्शो थोव्रक चेम्ने चाप्ब। ५ मोपा पिप आ डोंइती रे परमप्रभु यावे आ अरेशो मटीब आन कली तिलीन। मिनु पिप आ हुकुम पतीके बोल्यो दुम्ब। *हितोपदेस १६:१२* ६ पिप आ डोंइती आंम कली ठेयब मसेलो। मिनु पिप आ ठेयब गेय पाइब आन बाक्तीक लचा ममलो।

७ मारदे हना ठेयब आन दातेमी इ कली “याक्सो”, माइक्चा पुंडसीचा क्येडा “एक कुने, निस्सीन” दे ब्रेश्शो रिम्शो बाक्ब। ८ गो मार मरिम्शो ताप्तीवी हना यो, रीब पा निसाफ पतीकेमी मलावो। मारदे हना इ नेक्था डा मुरुम इ कली मुने तोक्ते हना, मार पाइनेवे। *लूका १४:७-११*

९ गो इ नेक्था डा मुर नु आंमा रीब पा लोव्र पावो। मेको मुर आ मरिम्शो पशो मफ्रावो। *हितोपदेस २०:१६* १० मिनु इ फ्रशो लोव्र नेंबमी इ कली मुने तोक्डे। मिनु इ नें गेना हना यो मरिम्शो लीब। ११ रिम्शो गारचा डा लोव्र पशोनु, चांदी के थालम वोइश्शो सुन के स्याउ खोदेशो बाक्ब। *हितोपदेस १५:२३* १२ जोक्ब तुइक्ब मुर आ हुइक्तीक लोव्र नेंब मुर कली सुन के औंठी नु गहना खोदेशो बाक्ब। १३ थमा लोव्र क्याक्ब मुर, आ होव्रप कली हुप्शो नाक्त अन्न रुप्ची ना डा फुं खोदेशो पा रिम्शो बाक्ब। मेको लोव्रम आ होव्रप आ थुं बारपाइक्ब। १४ सु मुरुमी मारेइ मगेथु, गेता, दे ठेयब लोव्र पाइबा, मेको मुर रेउ मयिपाइक्ब गोस्स नु फश खोदेशो बाक्ब। १५ फाल्तीकेमी हुकुम कली बिप्पाइक्ने चाप्नीम। ब्रोव्रशो लोव्रमी रुश जिक्ने चाप्ब। *हितोपदेस १५:१* १६ खुदो थित्तीवी हना, शुश मजावो, इ कली गाप्चा डा पा जावो। मारदे हना शुश जाप्तीवी हना, मेचा कुइक्ब। १७ इ नेक्था डा मुर आ खिं शुश मलावो। मारदे हना मेकोमी इ कली शुश जाक्शो तशा बीब। १८ आंम नेक्था डा मुर कली जोल पा सांकछी गेब मुर कोक्के तरवार नु हेश्शो ब्रा खोदेशो बाक्ब। १९ श्येत जशो ना थमा मसुइक्चा डा मुर कली थमा सुइक्चा खाइश्शो खुड नु मदुक्ब खोइल खोदेशो बाक्ब। २० सुमी थुं

खाइशशो मुर आन डोंइती कुम्सो पाइबा, मेको ग्यूमी वा रोइशशो नु गारमी हिकसी खेक्शो खोदेशो बाक्ब। मिनु वा खोइक्ब तुम्बु नु शी खोइक्ब बुम्स खोदेशो मेको सुर्ता पाइब मुर आ थुं बाक्ब। २१इ जोरी सत्रु शोत्रलु बेक्तेक्म हना, मेको आन कली थुलो। तूतू दाक्तेक्म हना, मेको आन कली ब्वाक्कु तूचा गेवो। रोमी १२:२० २२मो पाप्तीवी हना, मेको आन पिया तारी ब्रशो कोइला मोइशशो खोदेशो दुम्ब। मिनु परमप्रभु यावेमी इ कली इनाम गेब। २३उत्तर रे पा फशेमी रेउ यिपाइशशो खोदेशो पा, खुइशशो लोत्र फ्राइबमी मुर आन कुल राव किकपाइक्ब। २४गेना हना यो जिचा पोक्ब मीश नु बाक्चा क्येडा खिं आ तला तारी कुना कामी लशा सिक्सी पा बाक्चा रिम्शो दुम्ब। २५तूतू दाक्ब मुर कली ब्रोत्रशो ब्वाक्कु खोदेशो पा डोन रागी रे जाक्शो रिम्शो लोत्र बाक्ब। हितोपदेश १५:२५ २६ठीक पाइब मुर परमप्रभु यावे आ अरेशो मटीब नु गारत हना, मेको हिलोम बुक्शो ब्वाक्कु नु शुश ग्रांग्रा बाक्शो कुवा खोदेशो बाक्ब। २७शुश खुदो जचा नु आंम कली ठेयब मिम्शा मान पाइक्चा पुंइसीचा, निम्फा मुर कली मरिम्शो बाक्ब। २८सुमी आंम कली ठीक पा चलने मचाप्बा, मेको गारो ब्रेशशो सहर खोदेशो बाक्ब। हितोपदेश २६:११

मुर आन दाते डा मरिम्शो गेय

२६ हुप्शो महिनाम फुं नु अन्न रुप्ची ना रेउ यिशो खोदेशो पा मूर्ख आन कली मान पशो मगारचा डा बाक्ब। २फुर फुर पा बेरब भडगेरा नु हुरुर पा बेरब बेल्लुम खोदेशो पा मगारचा डा सराप शोर गाक्शो बाक्ब। ३शारा

कली सिरकाना, गधा कली करेली नु मूर्ख आ ची कली कोक्के माल्ब। हितोपदेश १६:२६ ४मूर्ख कली मूर्ख खोदेशो पा लोत्र मलेत्तो। मो पाप्तीवी हना, गे यो मूर्ख दुम्नेवे। ५मूर्ख कली आ मूर्ख खोदेशो पा लोत्र मपाप्तीवी हना, मेकोमी आंम कली निप्स पाइशशो मिम्सीब। ६सुम मूर्ख कली लोत्र चोत्रथ सोइक्बा, मेकोमी आंम खोइली खोइशशो नु हुश खाक्श पोक्शा श्येत जशो खोदेशो बाक्ब। ७मूर्ख आन देंतीके लोत्र खोरन्डे मुर आ खोइल खोदेशो पा शोर गाक्शो बाक्ब। ८मूर्ख कली मान पचा, फुल्लु कली श्येलेमी फ्रेंशा आप्चा माल्शो खोदेशो बाक्ब। ९शांबु दुक्शो मुर आ गुइमी चू ओत्रशो खोदेशो पा मूर्ख कली देंतीक लोत्र बाक्ब। १०मूर्ख मुर नु लां गाक्ब मुर आन कली गेय पपाइक्चा, हेंथे लिब्रा आप्शा गार सेल्ब मुर खोदेशो बाक्ब। ११कुचुममी मेशा लेंशा जशो खोदेशो पा, मूर्ख मुरुमी मूर्ख गेय लेंशा पना पन बाक्ब। २पत्रुस २:२२ १२आंम कली “जोक्ब तुइक्ब मुर नड” दे मिम्ब मुर क्येडा मूर्खन रिम्शो बाक्ब। हितोपदेश ३:७ १३अल्से मुरुमी “लाडगामी गुप्स का बाक्ब। लां मेर गुप्स हिरशो बाक्ब” देंब। हितोपदेश २२:१३ १४लाप्चो रोकशो चोक्शो खोदेशो पा, अल्से मुर आ ब्राख्येमी एर ओंथ लोकसीशा इप्ब। हितोपदेश ६:६-११ १५अल्से मुरुमी आ गुइ खमेम खुम्ब। मिनु मेको गुइ आ शोत्र सम्म लाइक्चा यो अल्सी पाइब। हितोपदेश १६:२४ १६शुश रुप्शा लोत्र लेप्ब ७ जना मुर क्येडा मूर्खमी आंम कली “रुप्ब जोक्ब नड” दे मिम्सीब। १७सु मुर आन जितीक खेतीकेम ओत्रबा, मेको लांम गाक्शो कुचुम आ नोफा ग्याइशशा

कीशो खोदेशो बाक्ब। १८दोपा निप्स ग्यशो मुरुमी ब्रशो लिब्रा हेंथे पा आप्बा, १९मोपा आ नेक्था डा मुर कली जोल पशा नोले “गो इ कली शाक्ता ला” देंब। २०शी मबाक्त हना, मी काप्ब। मोदेशो पा नोफा मुइक्ब मुर मबाक्त हना, जिचा खेचा मबोक्ब। *हितोपदेस २२:१०* २१दोपा मी मुइक्चा कली कोइला नु ब्रचा कली शी माल्बा, मोपा रीब पा गाइक्ब मुर जिचा पोक्ब बाक्ब। *हितोपदेस १५:१८* २२नोफा मुइक्ब आन लोत्र शुश ब्रोत्रशो जचा थोत्रक खोदेशो बाक्ब। मेको मुर आन थुं सम्म जाक्दीप्ब। *हितोपदेस १८:८* २३मरिम्शो थुं डा ब्रोत्रशो लोत्र खप के बोसुम चांदी खेक्शो खोदेशो बाक्ब। २४जोरी सत्रुमी शोत्रमी रिम्शो लोत्र पाइनीम। तन्न आन थुंमी मरिम्शो मिम्नीम। *मती १२:४५* २५इ जोरी सत्रुमी गे नु ब्रोत्रशो लोत्र पाप्तु हना यो, मेको कली थमा मसुतो। मारदे हना मेको आ थुंमी ७ ओटा ग्रांग्रा दिचा डा लोत्र खुइश्शा बाक्नीम। २६सुमी काइ मदाक्शो मुर कली “गो इ कली दाक्नुड” देखु पाइबा, मेको आ देखु पतीके मुर आन गुम्तीकेमी गूब। २७सुमी मुर पिक्चा, दे खाल्टा दोइबा, मेको आंमान बिक्ब। सुमी मुर कली चिप्पाइक्चा, दे फुल्लु लोकबा, मेको आंमा लोकसीशा थिश्शा लाइब। *भजन संग्रह ६:१६; उपदेसक १०:८* २८जोल पाइबमी सु कली जोल पवा, मेको कली काइ मदाक्ब। मिलो शिलो लोत्र पाइब मुरुमी नेल्ल खतम सेल्ब।

आंम कली ठेयब मसेलो

२७ “दीसा पाइनुड” दे ठेयब लेशशो लोत्र मपावो। मारदे हना मेको नाक्त मार दुम्बा गे मतुइक्नेवे।

याकूब ४:१३,१४ २अरु मुरुमी इ कली ठेयब सेल्मेक्ल। गे आंमा आंम कली ठेयब मसेलो। अरु आन शोत्र रे ठेयब देंमल, इ आंम शोत्रमी “गो ठेयब नड” मदेनो। ३फुल्लु नु बाल्वा हेल्लो बाक्नीम। तन्न मूर्खमी गेशो श्येत मेको निम्फा आस क्येडा हेल्लो बाक्ब। ४गाइक्चा मरिम्शो बाक्ब। चुरचा मेको क्येडा मरिम्शो बाक्ब। रुश पतीके कली सु फाल्ने चाप्बा डा? ५खुइश्शा दाक्चा क्येडा नेल्लेमी तुइक्चा डा पा हुइक्चा रिम्शो बाक्ब। *लेवी १६:१७* ६वारचमी हुइश्शो रिम्शो पचा कली बाक्ब। तन्न मदाक्ब मुर आन पुक्पु पाइश्शो हिंचा डा बाक्ब। *भजन संग्रह १४१:५; मती २६:४६* ७साप्पा रूशो कोत्रजमी खुदो यो मदाक्ब। तन्न शोत्रलु बेक्शो मुर कली मब्रोत्रशो जचा थोत्रक यो ब्रोत्रब। ८खिं रे डोन लशो मुर ग्योत्र रे डोन बेरशो चिक्ब खोदेशो बाक्ब। ९ब्रोत्रशो रिना पाइश्शो तेल नु धूपमी मुर आन थुं ग्येरशो सेल्ब। तन्न वारच आ अर्ती मेको क्येडा रिम्शो बाक्ब। १०इ वारच कली नु इ आफ आ वारच कली मप्रोनो। श्येत जवी ना, इ लोकब आ खिं मलावो। मारदे हना डोन बाक्शो लोकब क्येडा नेक्था बाक्ब मुर रिम्शो बाक्ब। *हितोपदेस १८:२४* ११आं तौ, जोक्ब तुइक्ब दुमो। मिनु गो ग्येरनुड। मोपा गो इ पबंम लोत्र पा आं कली आइक्च सेल्ब आन कली लोत्र लेन्ने चाप्नुड। १२निप्स पाइश्शो मुर श्येत जाक्चा चिक्शो तशा, खुंइसीनीम। तन्न मारेइ मजोक्ब मुरुमी मारेइ मतुइक्थु श्येत जाइनीम। *हितोपदेस २२:३* १३अर्को रागी डा मुर आन पबंम जमानी दुम्शो मुर, आ वा रोइश्शा लतीन। मुर आ पबंम

जमानी बाक्शो आ मारेइ मारेइ नेल्ले लतीन। *हितोपदेस २०:१६* १४ सुमी सुनी कना बोक्शा, आ नेक्था डा मुर कली ठेयब सेंदामी आसीक पाइबा। मेको आसीक ताइबमी “सराप पाइक्ती” देंब। १५ गेना हना यो जिचा पोक्ब मीश रेउ यिमेनु तप तप पा याप्ब ब्वाक्कु खोदेशो बाक्ब। *हितोपदेस १६:२३* १६ मेको कली अरेचा फश गिवार कली नाइक्पाइक्चा खोदेशो नु ग्युरा गुइमी तेल गुप्चा खोदेशो बाक्ब। १७ फलाममी फलाम कली शेप्शो खोदेशो पा, मुर कामी अर्को कली शेप्ब। १८ सुमी फोव्रशी रवा खाल पाइबा, मेकोमी फल जचा ताइब। सुम आ होत्रप कली रिम्शो पा कोव्रबा, मेको मान पाइक्चा पुंडसीब। १९ दोपा ब्वाक्कुम कुल तांडसीबा, मोपा मुर आ थुं दोदेशो बाक्बा, मेको अर्कोम तुइक्बा। २० बेक्शो मुर आन बाक्तीके नु जाम्शा लतीके गेनायो मरूशो खोदेशो पा, मुर आ मिक्च यो गेनायो मरूब। *उपदेसक १:८* २१ चांदी यपाइक्चा कली गारचा डा ग्योब नु सुन यपाइक्चा कली यो गारचा डा ग्योब माल्शो खोदेशो पा, मुर आ पतीक अर्को मुर आन ठेयब सेलतीक रे पा तुंडसीब। २२ मूर्ख कली अन्न नु चुम्लुम वोइश्शा तूलीमी चुशा हना यो, आ मूर्ख पचा गेनायो मग्रूब। २३ इ क्यारश भेडा दोदेशो तांडसीनीमी रिम्शो पा कोव्रडो। इ बी ब्यफ आन कली होस पा कोव्रडो। २४ मारदे हना शोंप गेना हना यो मलीब। सिरपेच यो नेल्ल पाला कली मलीब। २५ घांस जाम्शा लाइब। मिनु नक कोच्वा दाप्ब। मिनु पहाड रे घांस खुप्नीमी, २६ पाठा आ ऊन इन कली वा फेक्चा दुम्ब। बोका लेयशा रू ग्याप्ने चाप्नीनी। २७ क्यारश आ दूध इ

कली, इ खिं डा मुर आन कली नु इ गेय पाइब आन कली तूचा गाप्ब।

परमप्रभु कली टीब ग्येरशो बाक्ब

२८ परमप्रभु यावे आ अरेशो मटीब सुइम खेदा मपथु यो प्रोक्नीम। ठीक पाइबपुकी गुप्स खोदेशो पा महिंथु बाक्नीम। *यसैया ५७:२१* २ रागी डा मुरपुकीमी मरिम्शो पाम्तेक्म हना, हुकुम पाइब शुश दुम्नीम। तन्न निप्स पाइश्शो हुकुम पाइब बाक्त हना, गेना हना यो रिम्शो बाक्ब। ३ हुकुम पाइब मुरुमी पुडग आन कली दिप्तु हना, मेको बाली नाली बिग्रेब ठेयब रेउ खोदेशो बाक्ब। ४ परमप्रभु यावे आ अरेशो प्रोंडबपुकीमी अरु अरेशो मटीब आन कली ठेयब सेलनीम। तन्न परमप्रभु यावे आ अरेशो टीब मुरपुकीमी मरिम्शो पाइब आन कली तशा, मेको आन पर्बम सुर्ता पाइनीम। ५ मरिम्शो मुरपुकीमी निसाफ पतीके मार बाक्बा, दे मरुप्नीम। तन्न परमप्रभु यावे आ देशो पचा दाक्बपुकीमी नेल्ल रिम्शो पा रुप्नीम। ६ हेथे गाक्ब, थुं निक्शी पाइश्शो नु शुश क्येट थीब मुर दुम्चा क्येडा रिम्शो थुं पाइश्शो ठीक लां गाक्ब पुडग मुर दुम्चा रिम्शो बाक्ब। *हितोपदेस १६:१* ७ सुमी परमप्रभु यावे आ अरेशो टीबा, मेको जोक्ब तुइक्ब तौ बाक्ब। सु चहिं शुश जाइब नु दुक्ब मुर आ वारच दुम्बा, मेकोमी आ आफ कली मुने तोक्ब। ८ सुम आ क्येट मुर कली शुश चाइक्ब ताक्चा कली गेबा, मेको आ क्येट पुडग आन कली शिशी पाइब मुर कली हेक्ब। ९ सुमी परमप्रभु यावे आ अरेशो लोत्र नेंशा मटीबा, मेको आ परमप्रभु कली पुंडतीक लोत्र यो ग्रांरा

दिशो बाक्ब। *हितोपदेस १५:८* १० सुमी रिम्शो थुं पाइश्शो मुर कली मरिम्शो लां हेंथे गाक्पाइक्बा, मेको आंमा दोशो खाल्टामी बिक्ब। तन्न दोस मताइबपुकीमी रिम्शो ताइनीम। ११ शोप पाइश्शो मुरुमी आंम कली “गो जोक्ब तुइक्ब नड” दे मिम्ब। तन्न निप्स पाइश्शो पुडग मुरुमी मेको कली दोदेशो बाक्ब, दे रिम्शो पा तुइक्ब। १२ ठीक पाइबपुकी ग्रामानु, नेल्ल ग्येरसीनीम। तन्न परमप्रभु यावे आ अरेशो मटीबपुकी ठेयब दुम्तेक्म हना, मुरपुकी खुंडसीनीम। *हितोपदेस ११:११* १३ सुमी आंम पशो मरिम्शो पतीके खुइक्बा, मेको सोशो बोशो मदुम्ब। तन्न सुमी आंम पशो मरिम्शो शोव्बा नु प्रोइबा, मेको शिशी ताइब। *भजन संग्रह ३२:३-५; १यूहन्ना १:८-९* १४ परमप्रभु यावे कली मान पा हिंब मुर गेना हना यो ग्येरशा बाक्चा ताइब। तन्न मरिम्शो थुं पाइश्शो मुर श्येत जाइनीम। १५ परमप्रभु यावे आ अरेशो मटीबमी पुडग आन कली सासन पाप्तु हना, मेको ग्रीब गुप्स नु प्रेक्शा ग्राम्ब वां खोदेशो बाक्ब। १६ मरुप्ब हुकुम पाइब मरिम्शो दिप्ब मुर बाक्ब। तन्न जोल पा चेम्शो क्येट काइ मदाक्ब मुर शुश नाक्ती ब्रोइब। १७ सुमी मुर साइक्बा, मेको मबेक्म सम्म प्रोक्शा गाक्चा माल्ब। सुइमी यो मेको कली वारच मपामेक्ल। *उत्पत्ती ४:१४* १८ सु गेना हना यो रिम्शो पाइब बाक्बा, मेको रिम्शो बाक्ब। तन्न सु लां निक्शी हेंथे पा गाक्बा, मेको कालेम जाम्शा लाइब। १९ सुमी आंम रूमी गेय पाइबा, मेको मुर आ खिंमी शुश अन्न बाक्ब। शुश लोव् पा बाक्ब मुर चहिं पुडग दुम्शा लाइनीम। २० थमा सुइक्ब मुर शुश आसीक ताइनीम। तन्न सुम रीब पा क्येट चेम्चा

दाक्बा, मेको सजाइ मतथु, मब्रोइब। *हितोपदेस १३:११* २१ कुल कोव्मुचा मरिम्शो बाक्ब। तन्न मुरुमी आइक्च शोब्ले तचा कली मरिम्शो पाइनीमी कों। *हितोपदेस १८:५; ब्यवस्था १:१७* २२ कुइद मुर रीब पा क्येट थीब दुम्चा दाक्ब। मिनु “नोले थमा पा पुडग दुम्नुड” दे मेकोमी ममिम्ब। *हितोपदेस २३:४; १तिमोथी ६:९* २३ मिलो शिलो पाइब मुर आन क्येडा मुर कली हुइक्ब नोले मान पाइक्चा पुंडसीब। २४ सुमी आ आम आफ आस मार मार रोइश्शा “आं शोप बाक्ब” देंबा, मेको खतम पोक्ब आ वारच बाक्ब। *मत्ती १५:५* २५ शिंम मुरुमी जिचा पोक्ब। तन्न सुमी परमप्रभु यावे कली थमा सुइक्बा मेको आसीक ताइब। २६ सुमी आंम निप्स कली थमा सुइक्बा, मेको मूर्ख बाक्ब। तन्न सु तुइक्तीक थुं डा लां गाक्बा, मेको ब्रोइचा ताइब। *हितोपदेस ३:५-६* २७ सुमी पुडग कली गेबा, मेको आंमा यो श्येत मजाइब। तन्न सुमी पुडग आन पर्बम शिशी मपाइबा, मेको शुश सराप ताइब। २८ परमप्रभु यावे आ अरेशो मटीबपुकी ठेयब मुर दुम्तेक्म हना, मुरपुकी खुंडसीनीम। मिनु मेको बेक्तेक्म हना, ठीक पाइब मुर सोशा बोशा शुश दुम्नीम।

तुप्शो नु हुइश्शोम वारच पाइनीस

२६ शुश हुइक्चा पुंडसीशा यो, काइ मटीब दुम्तेक्म हना, मेको आन मतुइक्थु वारच पाइक्चा मपुंडसीथु, खतम दुम्नीम। *हितोपदेस १५:१०* २ ठीक पाइबपुकी सासन पाइब दुम्तेक्म हना, मुर नेल्ल ग्येरसीनीम। तन्न परमप्रभु यावे आ अरेशो मटीब मुरुमी सासन पाप्तु हना, मुर श्येत जाइनीम। *हितोपदेस ११:१०*

३ सुमी तुडक्तीक थुं दाक्बा, मेकोमी आ आफ कली ग्येरपाइक्ब। तन्न तेल्लेम नु गाक्ब मुरुम आ शोंप नेल्ल खेरब। लूका १५:१३,३० ४ पिप आ ठीक पतीकेमी आ रागी लीब। तन्न मेकोमी शुश तिरो पोक्तु हना, आ रागी खतम सेल्ब। ५ सुमी आ नेक्था डा मुर कली क्युकशा लोत्र पाइबा, मेकोमी मेको कली ग्याइल दाइशो बाक्ब। ६ मरिम्शो पाइब मुर आ मरिम्शो पतीकेमी श्येत जाइब। ठीक पाइब मुर चहिं शुश ग्येरसीशा कुम्सो पाइनीम। ७ ठीक पाइब मुरुम प्रुडग आन कली दोपा ठीक पचा, दे तुडक्नीम। तन्न परमप्रभु यावे आ अरेशो मटीबपुकीमी मारेइ मरुप्नीम। ८ शुक्शी पाइब मुरपुकीमी सहर खल्बल सेल्नीम। तन्न जोक्ब तुडक्ब मुरपुकीमी जिचा खेचा तेक्नीम। ९ जोक्ब तुडक्ब मुर मूर्ख नु निसाफ पतीकेमी लत हना, मेको मूर्खमी जिचा पोक्शा, रिशशा मगारब। १० हुश खाक्श पोक्ब मुरुमी दोस मताइब मुर आन कली काइ मदाक्ब। मेकोमी रिम्शो थुं पाइशो मुर कली साइक्चा माल्ब। ११ मूर्ख मुरुमी आ गाइक्चा नेल्ल कोइब। जोक्ब तुडक्ब मुरुम चहिं आ गाइशो तेक्शा, मकोइब। हितोपदेस १२:२३; हितोपदेस २५:२८ १२ सासन पाइबमी जोल लोत्र नंतु हना, मेको आ गेय पाइब नेल्ल परमप्रभु यावे आ अरेशो मटीब दुम्नीम। १३ प्रुडग नु मेको आन कली दिण्ब आन के थोत्रक का गारशो बाक्ब। मेको मार बाक्ब देशा हना, परमप्रभु यावेमी मेको निम्फा आस कली मिक्च ताइब सेल्शो बाक्त। हितोपदेस २२:२; अय्युब ३३:३०; भजन संग्रह १३:४ १४ प्रुडग आन कली ठीक पा निसाफ पाइब पिप आ सासन गेना

हना यो लीब। हितोपदेस १६:१२ १५ वोंइश आल आन कली तुप्शा, हुइशोनो, जोक्ब तुडक्ब दुम्नीम। मारेइ मशेशो वोंइश आलम चहिं आ आम कली मुने तोक्ब। हितोपदेस २२:१५; १ राजा १:६ १६ परमप्रभु यावे आ अरेशो मटीब मुरपुकी शुश दुम्तेक्म हना, मरिम्शो पतीक बारशा लाइब। तन्न ठीक पाइबपुकीम मेको आन खतम दुम्शो ताइनीम। भजन संग्रह ३७:३५-३६ १७ इ तौ कली रिम्शो पा शेंदो। मिनु मेकोमी इ थुं नाइक्पाइशो इ कली ग्येरपाइक्ब। हितोपदेस २३:१३ १८ परमप्रभु यावे आ लोत्र पाइब मुर मबाक्तेक्म हना, मुर नेल्ल हेंथे पाइब दुम्नीम। तन्न मेकोपुकीम आन परमप्रभु यावे आ अरेशो टिम्तेक्म हना, ग्येरसीशो मुर दुम्नीम। १९ इ गेय पाइब कली लोत्रम ला शेंने मचाप्नेवे। मारदे हना मेकोमी इ लोत्र रूप्तु हना यो मटीब। २० ममिम्थु लोत्र पाइब क्येडा मूर्खन रिम्शो बाक्ब। उपदेसक १:२; याक्ब १:१६ २१ इ वाइल कली आल रे नम पाइशो थुल्तीवी हना, नोले मरिम्शो दुम्ब। २२ चुरब मुरुमी राम्शी पोक्ब। गाइशो बाक्ब मुरुमी शुश मरिम्शो पपाइक्ब। हितोपदेस १५:१८; हितोपदेस २२:२४ २३ मुर आन ठेयब लेशशोमी मेको कली आइक्च सेल्ब। ब्रेम्शो थुं पाइशो मुर चहिं मान ताइब। २४ खुइ नु वारच्चु दुम्ब मुरुमी आम आ कली मदाक्ब। खुइ पचा पुंडसीब मुर आ सराप नेंबमी यो मारेइ मदेंब। लेवी ५:१ २५ मुर क्येडा हिंचा व्वारद खोदेशो बाक्ब। तन्न परमप्रभु यावे कली थमा सुइक्चा ब्रोंइतीक बाक्ब। मत्ती १०:२८ २६ शुश मुरुमी सासन पाइब नु ग्रुम्चा दाक्नीम। तन्न परमप्रभु यावे रे मुरपुकीम ठीक निसाफ ताइनीम। २७ ठीक पाइबपुकीमी मरिम्शो

पाइब तशा ग्रांग्रा दीनीम। तन्न परमप्रभु यावे आ अरेशो मटीबपुकीमी ठीक पाइब आन कली तशा ग्रांग्रा दीनीम।

आगुर आ लोव्र

३० एको मास्सा डा याकेह आ तौ आगुर आ देशो लोव्र बाक्ब। मेकोमी इथीएल नु उकल कली एको लोव्र पाप्तु। मेकोमी “गो परमप्रभु कली माल्ना माल्न बाक्ती, तन्न मथिदु। *उत्पत्ती २५:१२-१४* २थमा पा गो मुर आन दातेमी निप्स मपाइश्शो मुर दुम्ती। गो नु मुर आन के खोदेशो रुप्तीक मबाक्ब। ३गो जोक्ब तुइक्ब दुम्चा मशेंसीड। मिनु का ला बाक्शो परमप्रभु यावे कली मतुइक्नुड। ४सु स्वर्ग लशा, लेशशा यिशो बाक्बा डा? सुम फश कली आ गुइमी ग्याइक्ने चाप्बा डा? सुम समुन्द्र डा ब्वाक्कु कुम्लो पने चाप्बा डा? सुम रागी आ सुर सेला? मेको आ नें मार बाक्बा? मेको आ तौ आ नें मार बाक्बा? गे तुइक्नेवे हना” देनो। *अव्युब ३८:२८-३४*

५परमप्रभु आ लोव्र नेल्ल थमा बाक्ब। सु मेकेर लशा खुंडसीबा, मेको कली श्येत रे तेक्ब। *भजन संग्रह १२:७* ६मेको आ लोव्रमी मारेइ यो मतेम्दो। तेम्ताक्वी हना, इ कली हुइश्शा, गे जोल पाइब मुर देंचा पुंडसीनेवे। *ब्यवस्था ४:२* ७मिनु “गो इन कली थोव्रक निक्शी पुंडनुड। आं बेक्चा क्येडा डोंइती मेको आं कली गेयीनी। ८हेंथे पतीके नु जोल पतीक आं क्येडा डोन वोतीन। आं कली प्रुडग मसेल्यीनी नु शुश क्येट थीब यो मसेल्यीनी। आं कली माल्चा डा जचा थोव्रक गेयीनी। *तिमोथी ६:६-८* ९मारदे हना गो नु मारेइ मारेइ बाक्त हना, गो इन कली प्रेंनुड।

मिनु “परमप्रभु यावे सु बाक्बा?” देंनुडा कों? मिनु गो प्रुडग दुम्ती हना, खुइ पा आं परमप्रभु आ नें आइक्च सेल्शा मुने तोक्नुडा कों?” देंती। *प्रस्थान ५:२*

१०गेय पाइब आ पर्वम आ होव्रप नु मरिम्शो लोव्र मपावो। मो पाप्तीवी हना, मेकोमी इ कली सराप पाइब। मिनु गे श्येत जाइनेवे। ११का निक्शी मुरुमी आन आफ कली सराप पाइनीम। मिनु आन आम कली आसीक मगेनीम। १२का निक्शी मुरुमी आंम कली “गो गेना हना यो रिम्शो पाइब मुर नड” देंनीम। तन्न मेको आन मरिम्शो पशो मक्याम्सीशो बाक्ब। *हितोपदेस २०:६* १३का निक्शी मुर ठेयब लेशशो बाक्नीम। मेको शुश बोरशो बाक्नीम। १४का निक्शी मुर आन खुइ तरवार नु छूरी खोदेशो बाक्ब। मेकोपुकीमी प्रुडग आन कली नाक्शा, श्येत जाइब आन कली ब्वाइनीम।

१५मिनु याफे आ तमी निक्शी बाक्नीस। मेको निक्शीमी “गेयी, गेयी” देंनीस। मिनु अरु थोव्रक सां बाक्नीम। मेकोपुकी गेनायो मरूनीम। अर्को ४ ओटा थोव्रक बाक्नीम। मेकोमी गेनायो “मोक्ल” मदेनीम। १६बेक्शो मुर आन बाक्तीके, आल मथीब कोव्रज, ब्वाक्कु मतशो सोव्रशो रू नु मी, एको ४ ओटा थोव्रकमी गेनायो “गाप्ती” मदेनीम।

१७आफ कली शुक्शी पाइब नु आम कली मटीब मुर आन मिक्च खदीमी कोक्शा गुंडनीम। मिनु गिदपुकीमी ब्वाइनीम। *हितोपदेस २०:२०* १८थोव्रक सां बाक्नीम। मेको तशा गो छक लाक्ती। ४ ओटा थोव्रक कली यो रुपने मचबु। १९मेको मार बाक्तेक्म देंशा हना, ककाकुली आ सरीडम बेरतीके, रोगु

मेर बुस्स आन गाक्तीके, ठेयब समुन्द्रमी जहाज आन गाक्तीके नु वोंइश मुर नु मीश आल आस लां मेको रुप्ने मचबु। २० हेंथे गाक्ब मीश मुरुमी जाइब। मिनु आ शोत्र शोप्शा “गो मारेइ मरिम्शो मपड” देंब।

२१ मिनु थोत्रक सांमी रागी कली खिंखि पपाइक्नीम। ४ ओटा थोत्रक मेको फाल्ने मचाप्चा डा बाक्नीम। उपदेसक १०:६-७

२२ मेको ४ ओटा थोत्रक मार बाक्तेकम देंशा हना, वाइल पिप दुम्शो, मूर्ख जशा ब्वशा रूशो, २३ मरिम्शो मीश आल कली ग्युबे पशो नु वाइलीम आ होत्रपोक्म आ पा डा मेको खिं डा होत्रपोक्म दुम्शो, एको ४ ओटा फाल्ने मचाप्चा डा थोत्रक बाक्नीम। व्यवस्था २४:१-४

२४ रागीम ४ ओटा आइक्च थोत्रक बाक्नीम। तन्न मेकोपुकी थम जोक्ब तुइक्ब बाक्नीम। २५ रकमिक्च शुश बोल मपाइश्शो बाक्तेकम हना यो, आन जचा थोत्रक खुप्ची ना खुप्शा तेलनीम। हितोपदेस ६:६-८

२६ ब्वित्ती खोदेंशो जन्तु शुश बोल मपाइश्शो बाक्नीम। मो हना यो मेकोमी आन खिं रोंगुम सेल्नीम। २७ मिनु माले आन के पिप मबाक्ब। मोदेंशो बाक्तेकम हना यो, मेकोपुकी लडाइ पाइब खोदेंशो पा तांती खिक्शा गाक्नीम। २८ खोते आन कली गुइम ग्याइक्ने चाम्सीब हना यो, मेकोपुकी पिप आ दरवारमी बाक्नीम।

२९ मिनु थोत्रक सां बाक्नीम। मेको ठेयब मुर खोदेंशो पा गाक्नीम। मिनु ४ ओटा थोत्रक बाक्नीम। मेको ठेयब लेशशा हिरनीम। ३० मेको मार बाक्नीम देंशा हना, गुप्स, जन्तु नेल्ल आन दातेमी नेल्ल क्येडा बोल्यो बाक्ब। मेको सुइ क्येडा महिंब। ३१ ठेयब लेशशा गाक्ब भाले, बोका नु आ सेना आन डोंइती गाक्ब

पिप बाक्नीम। ३२ मे मूर्ख दुम्शा, आंम कली ठेयब सेल्तीवी हना, मे मरिम्शो पचा मिम्शो बाक्ते हना, इ कुल सुम्सो। ३३ मिनु दूध खाक्शोनु नौनी घ्यू गूब। नें तुप्शोनु, हुश यीब। मोपान गाइक्चा बोक्त हना, राम्शी बोक्ब।

लेमुएल आ देंशो लोत्र

३१ पिप लेमुएल आ लोत्र। मिनु पिप आ ममामी एको लोत्र पिप कली शेंशो बाक्त। हितोपदेस ३०:१

२ मेकोमी “आं तौ, गो इ कली मार देंनुडा डा? गो इ पर्वम परमप्रभु यावे कली पुंडता। ३ इ बोल मीश मुर आन कली मगेवो। मेको हेंथे गाक्बपुकीमी पिप आन कली खतम सेल्नीम। व्यवस्था १७:१७;

१ राजा ११:१, ४ ४ लेमुएल, पिप कली अडगुर शांबु तूचा मशिरब। मिनु सासन पाइबमी रकसी काइ तूचा मदुम्ब। हितोपदेस २०:१

५ ठेयब मुरपुकी तूशा दुक्तेकम हना, अरेशो लोत्र प्रेंनीम। मिनु श्येत जाइब आन कली निसाफ पतीकेमी दूली पाइनीम। मेको काइ मदुम्ब। ६ खतम दुम्चा चिक्शो मुर आन कली रकसी तूचा गेवो। मिनु अडगुर शांबु थुं लुकच लशो आन कली गेवो। ७ मोपा तूशा, मेकोपुकीमी आन प्रुडग दुम्तीके प्रेंनीम। मिनु आन श्येत ममिम्नीम। ८ ब्वाक्ने मचाप्ब नु मग्येरसीशो नेल्ल आन पर्वम ठीक निसाफ पावो। अय्युब २४:१२ ९ श्येत जशो नु प्रुडग आन कली ठीक निसाफ पशा वारच पावो” देंमाक्त।

रिम्शो गेय पाइब मीश मुर

१० रिम्शो गेय पाइब मीश आल सुम थिन्ने चाप्बा डा? मेको हीरा मोती क्येडा

शुश क्येट लाइब बाक्ब। *हितोपदेस १८:२२*
११मेको आ वोंइशेमी मेको कली रिम्शो
 पा थमा सुडक्ने चाप्व। मिनु आस माल्शो
 मारेइ मारेइ गाप्व। **१२**मेको ब्रोंइम सम्म
 आ वोंइश कली रिम्शो पाइब। मरिम्शो
 गेनायो मपाइब। **१३**मेकोमी ऊन नु रुवा
 खुप्शा, पांइशा शुश गेय पाइब। **१४**शुश
 लेयतीक मारेइ मारेइमी ब्रीशो जहाज
 खोदेंशो पा मेकोमी खिंमी जचा थोव्रक
 चाक्ब। **१५**मेको सुनी कना बोक्शा
 मार मार जचा तूचा क्येपाइक्ब। आ
 वाइलीम आन कली मार गेय पचा
 माल्बा, नेल्ल अरेब। **१६**शुश मिम्शा
 नोले मेकोमी रू का ग्याप्व। मिनु मेकेर
 आंमा चेम्शो क्येटीमी अडगुर खुम्ब।
१७मेको आ रिम्शो गेय पतीके आ गुइ
 बोल्यो बाक्नीम। **१८**मेकोमी आ लेयतीक
 थोव्रक रिम्शो पा लेयसीशो ताइब।
 नाक्दो आ बत्ती मकाप्व। **१९**मेकोमी
 प्यूरी लाइशा, पांइतो पांइब। आ वा
 आंमा प्रोव्रब। **२०**मेकोमी पुडग आन
 कली वारच पाइब। मिनु श्येत जाइब
 आन कली आन माल्शो गेब। **२१**मेको
 ग्यू पची ना महिंब। मारदे हना आ मुर
 नेल्लेमी होशो वा फेक्शो बाक्नीमी।
२२मेकोमी आ ब्रतीक रिम्शो पा सेल्ब।

मेको आ फेक्तीक प्याजी रड डा रिम्शो
 पा किरशो सुती वा के बाक्नीम। **२३**मेको
 आ वोंइश ठेयब मुर दुम्शा, सहर डा
 ठेयब लाप्योमी बाक्मेनु, रागी डा खाल्पा
 आन दातेमी बाक्ब। **२४**मेकोमी सुती के
 फेक्तीक वा सेल्शा लेयब। किप्शुर यो
 ग्याप्व लेयब आन कली लेयब। **२५**मेको
 नु सक्ति नु मान ततीके बाक्ब। मेकोमी
 दीसा मार दुम्बा, दे रिश्शा सुर्ता मपाइब।
२६मेकोमी लोव्र पवानु, जोक्ब तुइक्ब
 लोव्र ला पाइब। मिनु मुर आन कली
 शिशी पचा कली शेंब। **२७**मेकोमी आ
 खिं डा मुर आन कली रिम्शो पा कोव्रब।
 गेय मपथु, हैंथे पा मजाइब। **२८**मेको
 आ आलपुकीमी “आंइ आम ग्येरसीशो
 बाक्ब” देंनीम। आ वोंइशेमी यो मेको
 कली मान पाइब। **२९**मेकोमी “शुश मीश
 मुरपुकीमी रिम्शो पाइनीम। मेको आन
 क्येडा गे रिम्शो पाइब बाक्नेवे” देंब।
३०मुर आन दारस जोल बाक्ब। मेको
 दारस जाम्शा लाइब। तन्न परमप्रभु यावे
 कली मान पा हिंब मीश मुर मान पाइक्चा
 पुंइसीब। *हितोपदेस ११:२२* **३१**मेको मीश मुर
 कली आ गेय पा चेम्शो गेवो। सहर डा
 ठेयब लाप्योमी मुर नेल्लेमी मेको कली
 मान पामेक्ल।